


# KUAÑULIWA <sup>1</sup>

 . . .ni ikutwa hande ka kuutwa cwalo, sani ki sesinde. Kihande, kamita kubile kuli, sina ha Ni bulezi kale kuli, “Ne ni tabezi hane ba ni bulelezi kuli, ‘Ha lu ye kwa ndu ya Mulena.’” Ni lumela neli Davida yana bulezi manzwi ao kuli, “Ha lu ye kwa ndu ya Mulena.” Hakuna sibaka sesiñwi sesinde seni ziba kwa kuba, mwendi mina muna ni se muziba, kwanda kuba mwa ndu ya Mulena.

<sup>2</sup> Cwale, busihu bo, luna ni balikani mwahali mo baba zwelela kwa Georgia. Ba ka koboca limota kasamulaho—kasamulaho wa sico sa musihali busihu bo. Mi kona luka ba ni. . .Babañwi ba kubona bazwelela kwa, Ni sepa kuli muka libelela. Mi libaka za mafitelo ze lunani lika fiwa ku mina.

<sup>3</sup> Mi haili la Bulalu busihu luka zwelapili, mwa palo, mi kipeto, haiba Mulena alata, ni Sunda yetatama hape.

<sup>4</sup> Mi kutuha foo Chautauqua ikala ka la sikisi. Konakuli mina kaufela babana ni kale mafitelo a mina, lu kulubela nako yende, yetuna hakalo kwa Chautauqua. Kwani kona ko lubanga ni nako yende hahulu. Ha ki sicaba sesituna hahulu, fokuñwi lubanga ni. . . Lukona kuba ni ba. . .Ni sepa lwakona kuba ni baba teni sauzande ku sona, ka bunolo. Kono, kamita, mwaha o felile Ni sepa ne luna ni babakona kuesa likiti zesupa, nto yeñwi ye cwalo. Neli sibaka se si tezi hande, kono kuna ni sibaka sesituna mwa kuyema. Ni lipula ze ne ba beya mwateni. Mi kacwalo lu libelezi nto yani.

<sup>5</sup> Mi ki tabo ka kubona buñata bwa mizwale ya bakutazi mwahali mo. Ha ni sa hupula libizo la hae fa, ki mubuleli wa evangeli, Muzwale Humes ni Kezeli Humes, kana ki mina baba inzi foo, ni banana, lu tabile fa kuba ni bona, ni mubuleli. Babañwi, Muzwale Pat, Muzwale Daulton, mi, oh, ki babañata fela, Muzwale Beeler. Mi niboni Muzwale Collins fa nako nyana yefitile. Mi, oh, ikona kuba tata nyana ku ba biza ka mabizo kaufela bona. Kono lutabile hahulu ka kuba ni mina mwa ndu ya Mulena busihu bo. Yena Muzwale Neville yomunde yainzi kwa mulaho waka kwanu ni ku ni lapelisa haluyanga kwa kuluta Linzwi. Charlie, ki tabo ku kubona wena ni Kezeli Nellie mwahali mo busihu boo, ni banana. Ye ki. . .mi tuto ya Bible ki kuli kamita luli. . .Eeni, Muzwale Welch, Na fela. . .ne ni sweli kuku talima talima, Na mi bona muinezi kwa mulaho kafo cwale.

<sup>6</sup> Tuto ya Bible hañata ibanga ye sa sepahali hande, hanyinyani, mwa ziba, kuswana ni kuzamaya inge mu hata fa mezi a kangezi, mo lu li bizeza. Kono luikutwa fela kuli mwendi, ka kolo ye ni ka nako ye, kwakona kuba hande kutisa ke—

ke keleke ku se Ni nahana, kuba—kuba kutwisiso yetezi, mwa siyemo, ku seo luli sona ku Krete Jesu. Mi linako zeñwi Ni nahana kuli ku kutaza ki nto yende, kono Na lumela linako zeñwi, Muzwale Beeler, kuli kuluta kuya fahule hahulu kufita foo, lina ni kuba ka . . . sihulu kwa keleke.

Cwale, ku kutaza kuswala muezalibi, ni ku mutisa mwatasa katulo ka Linzwi. Kono kuluta kubeya mutu hande mwa sibaka seo ali sona. Mi ha lukoni kuba hande ni tumelo konji pili lu zibe mwa sibaka seo luli sona.

7 Cwale, haiba ba United States, ba naha yende ye kwanu, bani lumezi kwa Russia, kuba ndumeleti wa naha ye, kwa Russia, kona kuli haiba ba ni luma kwa Russia, mata a puso kaufela yeo United States inani ainzi kwa mulaho waka. Linzwi laka li ka swana fela ni la United States, haiba Ni kutekiwa kuba ndumeleti.

8 Mi cwale haiba Mulimu u lu lumile kuba lindumeleti za Hae, mata kaufela ali mwa Lihalimu, zeo kaufela Mulimu ali zona, Mangeloi a Hae kaufela ni mata a Hae kaufela liyemi kwa mulaho wa manzwi a luna haiba luli lu lumilwe ka swanelo, ili linumwana zelumezwi kwa sicaba. Mulimu una ni ku kuteka Linzwi, kakuli Uli ñozi ka tiisezo ye buhali, kuli “Kaufela se mu ka tama mwa lifasi, ki se Ni ka tama mwa Lihalimu. Kaufela se mu ka tamulula mwa lifasi, ki se Ni ka tamulula mwa Lihalimu. Mi Ni mi fa linotolo za Mubuso.” Oh, lisepiso zetuna cwalo zeo U li file kwa keleke!

9 Mi Na, kasamulaho wa zazi leliñwi . . . Buñata bwa mina, Na sepa, nemuliteni mo kakusasana kacenu ku to teezeza ha Ne ni sweli kulika, ka nzila yaka ya kuishuwa, ye bunolo, kutatulula po—po pono yene Ni boni ya Lihalimu.

10 Hanikoni nihaiba kulika ku kakanya sika kaufela seo mutu akona kuni bulelela kuli Mulimu u mu bulelezi sona. Ne ni ka li lumela neba Ni si ka li bona kale mwa Mañolo, Ne ni ka itakaleza kulumela linzwi la muzwale leo. Ni—Ni kona kupila fela hande ni Bibebe, kono niteñi ne Ni ka lumela kuli mwendi muzwale wa ka u li utwisisa ka nzila isili fela, kuli u lyanganehile fela ka lona hanyinyani. Mi niteñi Ne ni ka lumela kuli ki—ki muzwale waka.

11 Mi haiba kuna ni sika kaufela se si bila mwa pilu yaka, mi Ni sepa kuli hasina kuzwa kuna mwa lilimo zaka zetaha, kuli Hanina kulibala sene si ezahalile kakusasana la Sunda yefelile, kakuba biki mutumbi. Si ezize nto yeñwi kuna ye cincize bupilo bwaka. Ha—Ha ni sabi. Ha—Ha nina sabo ni yekana ka lifu. Lifu ha li sabisi ni hanyinyani. Mi ha—ha li mi sabisi haiba fela mwa utwisisa. Cwale, mwendi haiba . . . Muna ni kuba ni kutwisiso ya ku ziba cwalo, kakuli hakuna mukwa wa ku li tatulula ka ona. Hamukoni kufumana manzwi, kakuli haayo mwa litaluso za manzwi a Sikuwa, kamba mane hakuna nihaiba buka isili ya litaluso, kakuli li mwa Kuyakuile; hakuna maabani, hakuna

kamuso, kaufela ki tensi ya cwale. Mi hakuna kuli “Na ikutwa hande,” mi hola kuzwa cwale, “Ha ni ikutwi hande,” mi hola yeñwi, “na ikutwa hande hape.” Ki tensi ya cwale ka nako kaufela. Mwabona? Hakuna kutuhela, ki tabo fela ye kanya, nto yeñwi.

<sup>12</sup> Mi haku koni kuba sibi, haku koni kuba muna, haku koni kuba matuku, haku—haku koni kuba sika sifi kaufela sesikona kufita fa likamba la Lihalimu lani. Mi haiba Ni kona kuba ni kolo ya kubulela nto ye, ili, mwendi ha Ni koni. Haiba ha Ni cwalo, konakuli Ni lapela kuli Mulimu ani swalele. Kono haiba Nina ni kolo, mi iba kuli ki Mulimu ya ni lumeleza ku ngelwa ni kubona sika sesiñwi, Ne ni ka swanisisa kwa Lihalimu la pili. Mi cwale Na lumela, alimuñwi mwa Bibebe, wa libizo la, Ni sepa kuli neli Paulusi, yana ngezwi mwa Lihalimu la bulalu. Mi haiba neli Lihalimu le li kanya la pili le, Lihalimu la bulalu lani li bulukile sikamañi? Kona ha na si ka bulela ka lona fa lilimo ze lishumi ka zene! Na bulezi kuli na sa zibi haiba nali mwa mubili kamba na zwile mwa mubili. Ka yena muapositola yomutuna yani, ha ki kuikabela sibaka sa—sa—sa hae, kamba kusina kuikeza luna bañi sika sisili sina mwa na bezi yena, kono Na kona kubulela hamoho ni yena, Hani zibi kamba nali mwa mubili wo kamba na zwile mwa mubili. Taba yateni, Ni sweli na mi talimela.

<sup>13</sup> Mi Ni bile ni hakanyehanga kuli haiba Ni kona kufita Ni kubona lilo nyana leli nyendaela, ki moya, ni kubulela kuli, “Ki yani muzwale ni kezeli ba zamaya, yani ki Charlie ni Nellie. Yani ki Muzwale ni Kezeli Spencer baba zamaya fani.” Sani kamita ne si ni katazanga. Haiba meto aka ainzi mwa libita, anyanile, abolile, haiba zebe yaka haiyo kuli ikone kuutwa ni hanyinyani, mi haiba mali aka kaufela ona a hamulehile mwateni mi ba a omisize, mi ainzi mwa mezi kamba mwa mubu, mane ni ngana ya mihupulo yaka, maselu a booko bwaka a sinyehile kaufela, kona kuli Ni kona kuba cwani nto isili kwanda kuba fela moya osweli kupikuluha kafa ni kafa? Mi sani ne si ni bilaeza. Kana Ni kaabela cwani kubulela kuli, “Lumela, Muzwale Pat, oh, ki tabo luli ku kubona! Lumela, Muzwale Neville, mo Ni lakaleza ku kubona!” Kono Na hupula kuli, “Kihande, haiba Hanina sa kubonisa, mulomo wa kubulelisa kaufela, u bolile, ki liluli, kana Ni kona cwani kubulela kuli, ‘Lumela, Muzwale Pat,’ ‘Lumela, Muzwale Neville,’ kamba mañi kaufela, ‘Yela, Charlie?’”

<sup>14</sup> Kono cwale Ni ziba kuli seo si fosahalile. Kakuli liñozwi mwa Mañolo, ze Ni bulela kuli ha li shutani, “Kakuli haiba tabernakele ya lifasi ye isinyeha, luna ni yeñwi ye libelezi,” tabernakele yeñwi yena ni meto, mazebe, milomo, minahano ya booko. “Haiba tabernakele ya lifasi ye isinyeha!” Ina ni mubili o Ni kona kuutwa ka kuswala, ya kona kubulela.

<sup>15</sup> Mi cwale sitaha kuna, onafa cwale, kuli Mushe hana sa shwile mi ni mwa libita lene li sa zibwi ka lilimo ze mianda iketalizoho ni mianda yemilalu, mi Elisha na sa ile kwa Lihalimu

lilimo za kwa mulaho, kono fa Lilundu la Petuho ba fumanwa inze ba ambola ni Jesu.

<sup>16</sup> Kasamulaho Samuele amana kushwa mwendi ka lilimo zetalu kamba ze ketalizoho, mi mulauli wa musali wa kwa Endore a mu zusa, mi muloi yani awa ka pata, mi ali, “U ni pumile, kakuli ki wena Saule, wena luli.” Musali ali, “Kakuli Ni bona milimu!” Nali musali wa muhedeni, mwa bona. “Ni bona milimu ye zuha.”

<sup>17</sup> Mi Saule na sa muboni ka nako yani, mi sali, “U bonahala cwani? U ni tolokele mwa bonahalela.”

Ali, “Ki yo musisani, mi una ni kubo fa liheta la hae.”

<sup>18</sup> Ali, “Yoo ki yena Samuele, mupolofita, aku mu tise kwanu fapila ka.” Mi Ni bata kuli mulemuhe kuli Samuele na si ka cinca mwa buino bwa hae. Na sali mupolofita ona cwalo, a bulelela Saule ona cwalo luli zene ka ezahala habusa.

<sup>19</sup> Kacwalo, mwa bona, lifu ha li lu felelezangi sina mo lu lilelanga ni kubokolola ni kutongoka fa libita. Fela li cincanga fela sibaka sa maino a luna. Li luise kuzwa kwa sibaka se kuya ku. . . Busupali ki sikamañi? Haiba Ni pila hola iliñwi kuzwa cwale, Ni kabe ni pilile hahulu kufita mutu wa lilimo ze lishumi ka ze silezi za kupepwa, Ni kabe ni pilile hahulu kufita mutu wa lilimo ze ketalizoho za kupepwa. Busupali ha ki sesiñwi. Lu pila fela fa ka mulelo, kuli lueze nto yeñwi.

<sup>20</sup> Kihande, cwale, buñata bwa bahame ba lifateho zende babaliteni mo, babañwi ba kubona bana ni lilimo ze mashumi a silezi kamba a supile a kupepwa, bakona kubulela kuli, “Kihande, ki sikamañi se Ni ezize, Muzwale Branham?” U utile bana ba hao. U ezize so no lukela kueza.

<sup>21</sup> Mwendi Ndate yomuñwi ya supezi uteni mo, ukali, “Kihande, Ni tahuzi masimu, Ni ezize sa *kuli*. Nali kuba ni kutaze.” Kono uezize luli ona sa na ku lumezi Mulimu kuli ueze. Kuna ni sibaka sa hao.

<sup>22</sup> Ne ni ambola ni dokota ya hulile, maabani, alimuñwi wa balikani baka ba madokota, balikani, wa lilimo ze kona kueza eite bukana cwalo za kupepwa. Ni mulamu wa hae wa musali uteni mwa keleke mo busihu bo, mi nali fela yana, bilaela ka yena. Mi Na yo mubona. Mi hane Ni kalile fela kubulela ni yena, a lukuluha, a ni bulelela ka musipili wa kuzuma wa na kile aya ku ona lilimo za kale mwa Colorado, yona naha yeswana luli ko Ni zumelanga. Ali fela ya talifile mi ya ziba za eza! Mi se Nili, “Dokota, so sebelize nako yekuma kai?”

<sup>23</sup> Ki hali, “Ha no sa anya.” Mi ha niya se Ni li. . . “Mi mane linako zeñata,” yena ali, “Ni bile ni sebeza, inge ni lwala mutiyo waka, Ni tama sipula sa kupahamela pelesa fateni. Ni lwezi mukotana mi Na zamaya.”

24 Mi se Nili, “Eeni, kwa njetumuko bukaufi ni likamba la liabwa, ka tu kiloko kakusasana, ni liseli laka mwa lizoho, hane ni sweli kulika kufumana mwana yomunyinyani yana katazwa mwa mba kamba mahe yana katazwa ki kunyapisa.”

“Yeo ki niti.”

25 Mi se Nili, “Wa ziba, dokota, Na lumela, mwabuse bwa sibaka se si aba fahali se mo, mwahala kushwa ni ku sa shwa, Mulimu una ni sibaka sa dokota ya supezi ya belekile cwalo.”

26 Mioko yeñata ya engaenga mwa meto a hae mane akala kulila, a otolola lizoho la hae le li fokozi mi ali, “Muzwale, Na sepa cwalo.” Mwabuse mwa naha yeñwi, Mulimu u atula moyo wa mutu, seo ali sona.

27 Mi se Ni mufa Liñolo le li katulusa le. Linako zeñata, ka kulika kukekela mwa masimu a sileze ani busihu, ni kulika kutusa mutu, mwendi kusina nihaiba kuba ni masheleñi ka zona, kono ku lukile. Se nili, “Jesu na bulezi mwa Mañolo kuli, ‘Mbuyoti ki ya babana ni musa, kakuli ba ka shemubiwa.’” Mi yeo ki niti.

28 Mi busihu bo lubata kutoma keleke, mwa lituto zetalu ze, haiba Mulimu alumeleza, mo lu lukela kotalimela ni se lu lukela kotalima ku sona, seo luli sona. Lu ka kalisa ka kauhanyo ya 1 ya Buka ya liñolo la Paulusi kwa Efese. Mi lu ka nga likauhanyo zetalu zapili mwa lituto zaluna zetalu zetatama, kulika kunga kauhanayo mwa manzibwana ni manzibwana, haiba lukona. Busihu bo, la Bulalu, ni kakusasana ka la Sunda ona yetatama ye. Maefese, kauhanyo ya 1. Cwale hanze lu bala hamoho, Ni tabela kubulela cwana, kuli Buka ye ya Maefese luli i zamaelela hande ni Joshua ya Testamente ya Kale. Maefese, yona Buka ya Maefese.

29 Cwale, muhupule, haiba luka shutana nyana, ni tuto ya mina, mu lu swalele fela mi muitiise munze muli ni luna hamoho fa nako nyana. Lu si ka iapula kale, ha lu Mu kupeni kuli alutuse, halunze luinamisa litoho za luna.

30 Mulena, lu atumela Mulao wa Hao o kenile, ili o bukelelizwe hahulu kufita mahalimu kaufela ni lifasi. Kakuli lubala mwa Linzwi le, lona le li bizwa Bibebe, kuli “Sibeli sa lihalimu ni lifasi li kafela, kono Manzwi a Ka hana kufela.” Mi, mwa hola ye butokwa tuna ye Ni taha kwa katala kwanu busihu bo, fapila baba lekilwe ba Hao ka Mali, ona sicaba sesinde se sishwa sesili teni mo busihu bo, sinze si itiisa kulambela sepo kaufela ye konahala, ni ku swalelela kwa Liseli le li taha lani. Ha libe ka buñata hahulu, busihu bo, kuli mulumeli kaufela mo abone sibaka sa hae, mi mañi ni mañi kaufela ya si ka taha kale mwa sebelezo ye, aikapeleze kukena mwa Mubuso, Mulena, mi a ngongote fa munyako kufitela Muyemeli wa sikwalo a kwalula. Lumeleza cwalo, Mulena.

<sup>31</sup> Lu bala mwahali mo foo Bibeले ye haina toloko ya kwa mukunda. Mulimu, si lumelezi kuli Na mutanga Hao kamba mutanga usili kaufela alike kubeya toloko ya hae kwa Linzwi. Ha lu Li baleni fela ni ku Li lumela, ona mo Li ñolezwi. Mi sihulu luna balisana ba mitapi, luna batoneli baba ka yo kopana mwabuse ili mwa Naha ye kanya hamoho ni mitapi ye likani, mi luka yo yema fapila Kubateni kwa Mulena Jesu mi lu ka bona lusika lwani ha lu taha, lwa Paulusi, ni lwa Pitrosi, ni lwa Luka, ni Mareka, ni Mateu, ni bona bani kaufela, ni ku ba bona haba atulwa kwani ni likwata za bona. Mulimu, lumeleza kuli Ni yo tisa mishukwe ye likana teni milioni kwa mahutu a Hao ha Ni nze ni hohoba ka buikokobezo ni nze nitaha ka kukambama ni kuswala mazoho aka kwa mahutu a Hao amande, ni kubulela kuli, “Mulena, ba ki ba Hao.”

<sup>32</sup> O Mulimu, lu taze sinca ka Moya wa Hao, mi ni ka lilato la Hao ni bunde bwa Hao. Mi luna cwale, sina muloki hana bonisize cwalo mwa pina lilimo zeñata ze fitile kwa mulaho kuli, “Ngunyana Yende ye shwile, Mali a Hao hana kufela mata, kufitela Keleke ya Mulimu ipiliswa kutokwa kueza sibi hape. Mi haisamba, ka tumelo, Ni boni nuka ye uba ya Hao; lilato le li liulula libile pina yaka, mane ikana iba cwalo kufitela Ni shwa. Mi cwale mwa pina, ye munani yende,” u zwelapili kubulela uli, “Ni ka opela mata a kupiliswa kwa Hao; fo lulimi lo, lwa sikukuma lo lu shebile mane lukuza mwa libita.” Mi, libita halina lifu ni le li kana la bana ba Hao. Fela ki sibaka sa mapumulelo, kamba sibaka sa maipato, koo sesi bola se sika apala se si sa boli.

<sup>33</sup> Mi cwale busihu bo lubone se, Mulena, patalaza, sina mo si fezwi ku luna ka Linzwi. Lufe kutwisiso. Mi ulu tomahanye, Mulena, fa sibaka sa musebezi wa luna, kuli lukone kusebeza ka kusepahala kufitela U kuta. Lu kupa se ka Libizo la Jesu, ni ka bakala Hae. Amen.

<sup>34</sup> Cwale, Buka ya Maefese, sina hane Ni sweli fela kubulela, Na...kuya ka munahano waka, ki iliñwi ya Libuka zetuna hahulu za Testamente Yenca. Ya lu siyela, fo Bukalvini bu fapuhela kuba mutai omuñwi, mi bu Arminiani bumata fa mutai usili, kono haili Buka ya Maefese ya li ñomela hamoho mi ni kutoma Keleke ka swanelo.

<sup>35</sup> Cwale, Ni iswanisize ni Joshua. Haiba mu lemuha, Isilaele na lukuluhile kuzwa mwa Egepita, mi kuna ni likalulo zetalu za musipili wa bona. Kalulo iliñwi, neli kusiya Egepita. Kalulo yetatama, neli lihalaupa. Mi kalulo yetatama, neli Kanana.

<sup>36</sup> Cwale, Kanana ha iyemeli lusika lwa Mileniamu. Fela iyemela lusika lwa mukomi, lusika lwa ku koma, kakuli mwa Kanana ne ba bulaya ni kucisa ni kuhapa mileneñi. Kanti haili mwa Mileniamu mona hakuna kuba lifu.

37 Kono nto yeñwi yeo ieza, itisa kubeiwa baba lukile ka tumelo, kasamulaho ba mana kulumela ku Mushe ba zwa mwa Egepita. Kukeniswa, kwa kulatelela Siita sa Mulilo ni kusulula kwa mali a ngunyana ya sitabelo mwa lihalaupa. Mi cwale kasamulaho ni kukena mwa naha yene ba sepisizwe.

38 Cwale, ki ifi naha ye sepisizwe mwa Testamente Yenca ku mulumeli? Sepiso ki Moya o Kenile. “Kakuli linako ze taha za mafelelezo,” Joele 2:28, “kuli Ni ka sululela batu kaufela Moya wa Ka. Mi bana ba mina ba bashimani ni basizana ba ka polofita. Mi ni batanga ba Ka baana ni basali Ni kaba sululela Moya wa Ka, mi ba ka polofita. Ni ka tahisa limakazo mwa lihaliimu. Ni mwa lifasi, liita za mulilo, ni musi, o bonahala inge tukundukundu.” Mi Pitrosi ki hali, ka Lizazi la Pentekota, kasamulaho wa kubala palo ya hae ni kukutaza, “Mubake, mañi ni mañi wa mina, mi mu kolobezwe ka Libizo la Jesu Kreste kwa swalelo,” ku takula, ku swalela, ku zwisa fateni bufosi kaufela.

39 Kana mulemuhile, Joshua, ba si ka sila kale Jordani, Joshua ali, “Mukene mwahala kopano mi mutapise liapalo za mina ni kuikenisa ili mina mañi ni mañi wa mina, mi muuna ufi kaufela asike a sutelela ku musala hae, kakuli mwa mazazi amalalu muka bona Kanya ya Mulimu.” Mwabona? Ki—ki mukoloko wa buitukiso bwa kukena mwa sepiso. Cwale, sepiso kwa Isilaele, neli, Mulimu na file Abrahama sepiso ya naha, ya Palestine, mi ne ilukela kuba liluwo la bona kuyakuile. Mi kamita ne ba lukela kupila mwa naha yani.

40 Cwale, ba taha mwa likalo zetalu, kutaha kwa naha ya sepiso ye. Cwale mutalimele, iswanisizwe hande mwa Testamente Yenca.

41 Cwale se, sina ha Ni bulezi, ni ka tokwa kukusalumelelana hande ni minahano ya mina babañwi. Mina babañwi sicaba sesinde sa ba Nazarene, Church of God, ni babañwi cwalo, musike mwa situhela kuli si holofaze, kono mu si talimisise fela ka tokomelo ni ku bona mifuta yatani. Mutalime mi mubone haiba libaka kaufela ha li zamaeleli.

42 Nekuna ni likalulo zetalu mwa musipili, mi kuna ni likalulo zetalu za musipili woo. Kakuli, lu beiwa baba lukile ka tumelo, ka kulumela ku Mulena Jesu Kreste, ka kusiya naha ya Egepita, kuzwa mwateni. Mi kipeto lwa keniswa ka kubeya Mali a Hae, lutapiswa kwa libi za luna, mi luba bazamai ni baeti, lunze lu bulela kuli lu bata naha, muleneñi ona ni kutaha, kamba yona sepiso.

43 Kona mwa na ezelize ni Isilaele mwa lihalaupa, baeti, nebasina sibaka kwa kupumula, ne ba zamaya busihu ni busihu, inge ba latelela Siita sa Mulilo, kono mafelelezo ba taha mwa naha ya sepiso mo ne bailo yaha.

44 Kwani kona ko mulumeli ataha. Utaha pili mwa temuho ya kuziba kuli ki muezalibi; mi kutuha fo wa kauhanywa ka mezi,

ili kutapiswa ka mezi, ka Mali, mi. . . kamba kutapiswa ka mezi a Linzwi, nitaluse, kulumela ku Mulena Jesu Kreste. Kutuha foo, kubeiwa baba lukile ka tumelo, uba muca sanda, mi ni kozo ni Mulimu, ka Kreste, ku kolobezwa ka Libizo la Jesu Kreste, kuli a zwiswe mwa musipili. Mwa utwisisa kana? Kukenya mwa musipili! Kona kuli uba mueti ni muzamai. U mwa musipili wa hae kuya kai? Kwa sepiso ya na file Mulimu.

<sup>45</sup> Isilaele na si ka amuhela kale sepiso, kono ne bali mwa musipili wa bona. Mi kusina kutisa. . . Shangwe amu utwisise. Fani kona foo mina, ba Nazarene ni Pilgrim Holiness, ni babañwi cwalo, fo mu palelelwa. Kakuli, Isilaele, ha ba taha fa sibaka seo, sa Kadeshi-Barnea, fani matwela hane baile kwani se bali, “Naha ki yetuna.” Kono babañwi ba kubona bakuta ni kubulela kuli, “Halukoni ku ihapa, kakuli minzi ina ni makwakwa a mamota, ni zeñwi kaufela.” Kono Joshua ni Kalebu ba yema, mi bali, “Luna ni mata ni kufita mane lwakona ku ihapa!” Bakeñisa litaba zabona zene ba nyatezi kale, ne ba lumela mwa misebezi ya sishemo, kuluka ni kukeniswa, mi ne ba sakoni kuya fahule nihanyinyani. Mi, muteeleze, kopano yani kaufela ya shwela mwa lihalaupa. Kono bababeli bene baile mwa naha ya sepiso ni kutisa bupaki kuli neli naha ya bunde, “mane nelukona ku ihapa kube cwani kamba cwani, kakuli neli sepiso ya Mulimu.” Cwale kufita kuli sicaba sizwelepili kuya kwapili, kwa kuamuhela Moya o Kenile, kubulela ka malimi, ku amuhela mata a Mulimu, kolobezo ya Moya o Kenile, lisupo, zekomokisa, limakazo, ba utwa kuli ne lika sinye sizo sa tuto yabona. Mi kisikamañi sene si ezahalile ku bona? Ba shwela mwa naha! Yeo ki niti.

<sup>46</sup> Kono haili balumeli, bo Kalebu ni Joshua ba itiisa, sani neli kuya kwa sepiso, ba zwelapili kuya mwa naha, mane ba hapa naha, ba yo pila mwa naha, kuba liluwo. Mi ha lu yemelangi fa kuba baba lukile fela, kukeniswa. Halu zweleñi pili kwa kolobezo ya Moya o Kenile. Lusike lwa yemela fa kulumela fela ku Mulena Jesu, kuba baba kolobelizwe. Lusike lwa yema kakuli kuti U lu kenisize kwa bupilo bwa sibi. Kono cwale lu ikapeleze katata kukenya mwa sibaka, kwa sepiso ya kolobezo ya Moya o Kenile. Kakuli Pitrosi na bulezi cwana, ka Lizazi la Pentekota kuli, “Kakuli sepiso iku mina, ni kwa bana ba mina, ni ku babali kwahule kaufela, mane ni babañata be Mulena Mulimu wa luna aka biza.”

<sup>47</sup> Kacwalo, Efese fa ilu yemela sina Joshua, ka sibaka sateni. Mwa lemuha, Joshua, kasamulaho wa kusilela mwa naha ya mwabuse, ni ku yo hapa naha, mi ki ha sa aba naha. “Efraimi *kifa*, Manasse *kifa*, ni yo *kifa*, Gadi *kifa*, Benjamine *kifa*.” A aba naha.

<sup>48</sup> Mi mulemuhe! Oh, se sa cisa fela lipilu zaluna! Mañi ni mañi wa bahame ba Siheberu bani, fa kupepa bana bani, na bulela sibaka sateni luli, mwa butuku bwa kunyapisa kwa hae, ona kwa na ka yopila mwa naha ya sepiso. Oh, ki palo yetuna! Kambe fela



ne lu ka kena ku yona mwa butungi, ya kona kulu tanda liholo ni liholo. Zazi leliñwi haluka ba ni keleke yaluna hase ifelile hande, Ni ka tabela fela kunga kweli ya mutumbi kamba zepeli, kuina fela hande ku yona. Mutalimele fani, mañi ni mañi wa bahame bani, ha na bulela inge kuli, “Efraimi,” hanali mwa butuku bwa kupepa, ona cwalo ne si mubeya mwa sibaka kone ku ka yo hata mahutu a hae mwa oli. Ona cwalo fela luli mañi ni mañi wa bona kaufela kone ba fumaneha!

<sup>49</sup> Mi Joshua, kusina kuziba taba ye, kono ka susumezo, a zamaiswa ka Moya o Kenile, kasamulaho wa kuba mwa naha ya sepiso, afa mutu ni mutu sepiso ya hae, ona cwalo fela Moya o Kenile so no sepisize kufitela mwa kupepwa kwa mulaho kwani.

<sup>50</sup> Kuli mane Mulimu ubeile babañwi cwalo mwa keleke, ka butuku bwa kupepa! Oh, ba banga ni nako yende. Keleke haisweli kutonga mwatasa nyandiso kwande a lifasi, ka kulumela ku Mulena Jesu, kuli sepiso ya Moya o Kenile ki ya niti fela ku luna sina mone ibezi kwa Pentekota, mo ba tongela ni kulila mwatasa butuku bwa kupepa! Kono cwale ha ba pepwa, mi ni kupepwa mwa Mubuso wa Mulimu ka swanelo ya sibaka, kona kuli Moya o Kenile ubeile mwa keleke, kuba baapositola, babañwi kuba bapolofita, babañwi kuba baluti, babañwi kuba balisana, babañwi kuba babuleli. Kona kuli U file mwahali mwani, za kubulela ka malimi, kutoloka malimi, zibo, butali, limpo za kufolisa, mifuta ya limakazo kaufela.

<sup>51</sup> Ko kuinzi keleke . . . Cwale wo kona mulelo waka wa kueza se. Keleke kamita isweli fela kulika kunga sibaka sa mutu uyomuñwi. Kono mina musike mwaeza cwalo. Hamukoni kulima mbonyi mwa sibaka sa Efraimi, haiba ki mu baha Manasse. Mu lukela kunga sibaka sa mina ku Kreste, ka swanelo mube ni sina. Oh, liba ze tungile mi ze fumile luli ha lufita fo, kuli mane Mulimu ubeya keleke kuli ibulele ka malimi, asili . . . Cwale, lu lutilwe linako zeñata kuli, “luna kaufela lulukela kubulela ka malimi.” Ao ki mafosisa. “Luna kaufela lu lukela kueza cwalo.” Batili, halu lukeli. Ne ba sa lukeli kueza sani. Mañi ni mañi nali . . .

<sup>52</sup> Mañi ni mañi, naha ne ifilwe ni ku abiwa ka susumezo. Mi, mañi ni mañi, Ne ni ka nga Mañolo ni ku mi bonisa handendende, kuli na ba beile mwa sibaka mo ne ba lukela kuba, ka swanelo ya sibaka, kuli mane mishobo yemibeli ya bahabo ne ilukela kuyahela mwabuse bwa nuka, kuli mane bomaa bona ne ba huwa ona cwalo ka nako ya kupepa, ni kuli mane sibaka sifi ni sifi kona mo ne si lukela kubela.

<sup>53</sup> Mi cwale ha se mukeni, seo ha si talusi kuli mu lukuluhile kwa ndwa. Mu sa na ni kulwana mihato kaufela ya mubu kaufela fo mu ka yema. Kacwalo, mwabona, Kanana ne i sa yemeli Lihalimu lelituna, kakuli lindwa za yona ni matata ni lipulao

ni kulwana, ni zeñwi cwalo. Kono ne i yemela sona se, kuli ibe muzamao o petehile.

<sup>54</sup> Ona fani kona fo ipalelelwa keleke kacenu, fa muzamao. Kana mwa ziba kuli nihaiba mukwa wa hao luli wakona kutibela mutu kwa foliso? Ku sa ikuteka kwa hao, bakeñisa libi za hao zo si ka bakela wena mulumeli, zakona kueza kuli keleke ye ipalelwe kufeleleza. Mi ka Lizazi la Katulo u ka yo ikalabela ka mukwa ufi kaufela o cwalo. Oh, mu li, “Cwale, libelela fa muzuzu, Muzwale Branham.” Kihande, yeo kona Niti. Munahane fateni!

<sup>55</sup> Joshua, kasamulaho wa kusilela mwa naha ya mwabuse, Mulimu amufa sepiso kuli. . .Munahane fela, kuli alwanise ndwa yateni kaufela kusina kubulaya fateni nihaiba muuna alimuñwi, kusina neba kufaluha, kusina kuba nihaiba nasi, kamba kapongisi ka milyani ya bazamai kamba sikwata sa baba cwalo. Amen. Mulimu ali, “Naha ki ya mina, amuye mulwane.” Munahane, ka kulwanisa ndwa, mi hakuna ba Red Cross bukaufi ni hanyinyani, hakuna ya ka holofala!

<sup>56</sup> Mi ba bulaya ma Amori ni ma Hiti, kono nekusina ni alimuñwi yana holofalile mwahala bona kufitela sibi sikena mwa kopano. Mi cwale Akani hana ngile lisila la kwa Babilona ni siemba sa gauda yani, ni ku li pata mwatasa tende ya hae, mi lelitatama habusa kwa bulaiwa baana baba lishumi kababa silezi. Joshua ali, “Amutuhele! Amutuhele! Mulibelele fa muzuzu, kuna ni se si fosahalile! Kuna ni se si fosahalile fa. Luka ba ni kuitima lico mazazi a supile. Mulimu na lu file sepiso kuli, ‘Hakuna ya ka lu holofaza.’ Lila zaluna li ka wa kwa mahutu a luna. Kanti kuna ni se si fosahalile fa. Kuna ni se si fosahalile kokuñwi, kakuli luna ni baana baba lishumi kababa silezi ili litupu zelobezi fa. Ki mizwale ya Isilaele, mi ba shwile.”

<sup>57</sup> Ki kabakalañi hane ba shwile, baana babasina mulatu? Kakuli muuna alimuñwi na zwile mwa sikuka. Mwabona libaka se hasina ni ku lutiwa? Keleke ina ni kutomahanyiwa hande, kutomahanyiwa hande ni Linzwi la Mulimu, kutomahanyiwa hande ni Mulimu ni kutomahanyiwa hande ni mañi ni mañi, kuzamaya hande ka swanelo, ni buiswalo, fapila batu kamukana, lunze lu saba Mulimu. Kakuli muuna alimuñwi na uzwize lisila, ni kueza sika sa na sa lukeli kueza, abulaisa bupilo bwa baana baba lishumi ni baba silezi! Ni sepa kuli neli baba lishumi ni baba silezi, mane mwendi kufitelela. Ni lumela kuli neli baana baba lishumi ni baba silezi baana bene ba shwile.

<sup>58</sup> Joshua abiza, ali, “Kuna ni se si fosahalile! Mulimu na lu sepisize, kono kuna ni se si fosahalile.”

<sup>59</sup> Ha lutisa bakuli fapila luna, mi ba palelwa kufoliswa, lu lukela kubiza mukopano wa kuitima lico, lubize mukopano. Kuna ni se si fosahalile kokuñwi. Mulimu na lu file sepiso, Mulimu una ni kutiyela kwa sepiso yani, mi Uka peta cwalo.

60 Mi abiza kuli kube kuitima lico. Mi ba fumana, ha ba feza kulaula. Mi Akani aitumelela. Mi se ba mu bulaya Akani, lubasi lwa hae ni bona kaufela, mane ba ciseleza ni mufuse wa bona, mi ba usiya ona cwalo kuba kupuzo. Mi Joshua azwelapili mwa lindwa, inza hapa lika kaufela, kusina nihaiba kufaluha kamba sitombo. Ki fo he cwale.

61 Zazi leliñwi na tokwile kuba ni nako nyana, nako yeñwi nyana. Lizazi ne liya li likela, baana ne ba sa lwani hande ka nako ya busihu. Joshua, yena mulwani yomutuna yani, ya tozizwe ki Mulimu, yana beilwe hande ka swanelo mwa sibaka, inge Maefese kwa Keleke yenca, moba luwezi, a luwa, ili kuluwa naha, ku yo hapa. Na tokwa kuba ni nako, kacwalo ali, “Lizazi, aku yeme!” Mi se li yema kufitela liholo ze twelufu, kufitela a hapa naha. Mwabona?

62 Cwale Buka ya Maefese ilu beya mwa sibaka hande ku Kreste, sene bali ku sona mwa Naha ye Kenile. Ha lu si ka beiwa mwa Naha ye Kenile, kono ki mwa Moya o Kenile! Cwale ha lu baleni Linzwi lililiñwi fela, mubone keleke yateni mo ibezi ye petehile.

*Paulusi, muapositola wa Jesu Kreste ka tato ya Mulimu, . . .*

63 Oh, Na lata sani! Mulimu na mu ezize muapositola. Hakuna yomuhulu yana mu beile mazoho, hakuna mabishopu bene ba mu lumile kuya kai kamba kai, kono Mulimu amu biza ni ku muezwa muapositola.

*Paulusi, muapositola wa Jesu Kreste ka tato ya Mulimu, ku babakenile (bao ki baba kenisizwe) babali kwa Efese, ni kubaba sepahala ku Jesu Kreste:*

64 Mutalimele mwa bulelela taba ye. Se ha ki sa baba sa lumeli. Se ki sa kwa keleke. Ki kubizwa kwa baba bizizwe, baba kenisizwe ni baba bizizwe bona babali ku Kreste Jesu.

65 Cwale, haiba mubata kuziba mwa ku kenela ku Kreste Jesu, haiba muka apula mwa Makorinte Bapili 12, ibulezi kuli, “Kakuli ka Moya ulimuñwi luna kaufela lu kolobelizwe mwa Mubili ulimuñwi.” Cwani? Lu kolobelizwe ka sikamañi? Ka Moya o Kenile. Isiñi ka kolobezo ya mezi, mina sicaba sa ba Church of Christ, kono ka taku yetuna ya M-o-y-a, ka Moya ulimuñwi. Isiñi ka kuswalana mwa mazoho, ka liñolo liliñwi, ha ki ka kufafaleza kulikuñwi. Kono ka Moya ulimuñwi luna kaufela lu kolobelizwe mwa Mubili ulimuñwi, liluwo la luna, naha yana lu file Mulimu kuli lupile ku yona, ona Moya o Kenile. Inge fela mwa na fezi Kanana kwa Majuda, U lufile Moya o Kenile. Ka Moya ulimuñwi luna kaufela lu kolobelizwe mwa Mubili ulimuñwi. Mwautwa nji?

66 Cwale, u bulela kwa Makanana ba moya, Isilaele, Isilaele wa moya ya sa yolile mwa naha. Oh, kana hamu si ka tabela kuli muzwile mwa garliki ya Egepita? Kana hamu tabeli kuli muzwile

mwa lihalaupa? Mi, muhupule, neba na ni kuca manna, lico za Mangeloi za mwa Lihalimu, kufitela ha ba yo silela mwa naha ya mwabuse. Mi hase ba silezi mwa naha ya mwabuse, manna ya tuhela kuwa. Neba se ba hulile ka nako yani, mi ba ca mbonyi ya kale mwa naha yani. Cwale, cwale bakeñisa kuli hamusali limbututu ni hanyinyani, cwale bakeñisa kuli ha mu sa lakaza mabisi amande a Evangeli, kuli ha mu sa lukela ku shemba shembiwa, ni ku nata natiwa fa mukokoto, ni ku hapelezwa kutaha kwa keleke, kono bakeñisa kuli semuli Bakreste baba hulile luli, mwakona kuca nama ye tiile cwale. Mu itukisize kutaha ku sesiñwi, a bulela. Mu itukisize ku utwisisa sesiñwi se si tibile mi sa luli. Oh, lu ka kena ku zona handende. Mi, oh, ki ze patilwe haisamba lifasi litomwa. A bulela kuli, “Cwale bakeñisa kuli mutile ku se, Ni bulela taba ye ku mina.” Isiñi ku baba sa zo siya fela Egepita, isiñi ku bani baba sa li mwa musipili, kono ki ku babali mwa naha ya sepiso, baba amuhezi sepiso.

<sup>67</sup> Ki babakai baba amuhezi sepiso ya Moya o Kenile? Oh, kana ha mu tabeli kuli mu se muli mwa naha cwale, mu ca mbonyi ya kale, muca lika ze tiile za Mulimu mi muna ni kutwisiso ye otolohile hande. Mi—mi minahano ya mina ya moya ha isika lyanganeha. Mwa ziba hande Yo ali yena. Mwa ziba hande Seo ali sona. Mwa ziba hande ko mu libile. Mwa ziba hande ka Zona kaufela. Mwa ziba ku Ye mu lumezi ku yena mane mukolwa kuli Wakona kubuluka za buitamo bwa Hae ka lizazi lani. Oh, yani ki yena, yani ki yena yo Paulusi a ambola ka yena cwale. Muteezele hande. Cwale mutalimele.

*. . . ya sepahala ku Kreste Jesu:*

<sup>68</sup> Cwale, ni bata kuli keleke ikutele sani. Kana lukena cwani ku Kreste? Ka kuikopanya mwa keleke nji? Batili. Ka kubeisa libizo la luna mwa buka nji? Batili. Ka ku kolobezwa ka kucimbekiwa nji? Batili. Kanti lukena cwani ku Kreste he? Ka Moya o Kenile ulimuñwi luna kaufela lwa kolobezwa mwa sepiso iliñwi, ili Mubili, mi luba bo muca sanda sa zeo kaufela za mwa naha. Amen! Oh, Na—Na lata cwalo. Kambe Hani si ka silela linzwi, Ne ni ka huwa. Mawi, ha Ni kena mwa naha ye, seli nako. Ni mwa lapa cwale; Ni mwa Kanana. Nina ni kuina kwa sibaka kaufela seo Mulimu ubata kuitusisa na ku sona. Ni sweli kuhata fa mubu o kenile, ni mwana wa Mulena, ni apezi liapalo mi ni itukisize. Ni zwile mwa Egepita, ni se ni keni mwa naha ya sepiso, ni yemezi miliko, ni silezi mwabuse bwa Jordani kukena mwa sepiso ye fuyozwi ye. Oh, Ni ufumana cwani? Ka Moya ulimuñwi. Ka nzila yeswana yana U fumani Paulusi ka yona, u ezize ku na ona cwalo mone U ezelize ku yena, ki nto yeswana ni yene U ezize ku mina. Ka Moya ulimuñwi luna kaufela lu kolobelizwe. Isiñi ku fafalezwa, ku fafalezwa fela nyana kwa Ona, kuikutwa hande luli; kono ki kunwela mwatasi a mezi! Kaufela ki kutapa kunwela mwatasa mezi, mwa Moya o Kenile. Yani kona sepiso.

69 Maefese yaluna, Joshua wa luna, ili ona Moya o Kenile, *Joshua* italusa kuli “Jesu, Mupulusi.” Joshua italusa Moya o Kenile mwa buino bwa moya sina mone kuinezi ku za nama, kuli ki Yena Ndwalume yomutuna. Ki yena Mueteleli wa luna yomutuna. Sina Mulimu mwa na bezi ni Joshua, kona ni Mulimu (mwa inezi mwa Moya o Kenile) yanza lu zamaisa kwa ni kwa. Mi cwale sibi ha si taha mwa kopano, Moya o Kenile ubata kuli kube ni kuyema hanyinyani, “Ki sikamañi se si fosahalile mwa keleke ye? Kuna ni se si fosahalile.” Oh, kana hamuboni mo se lubezi ni bana babañata ba Kishi cwale? Bo Saule babañata hahulu babazwa mwa mikopano ya bukutazi ni likolo za lituto za bulapeli mi ba yo luta lika ze kopami ze, sina Bibehe ha ibulezi kuli kona mo ba ka ezeza. “Mo ku bonahalela, habana Tumelo, ba ikauhanya ilibona ku mina, habana kutwano ni mina, ni lika zeñwi cwalo, bana ni mubonahalelo wa bumulimu kono ba latuzi Mata ateni, kuba bacwalo muzwe kwateni.” Ha ba zibi ko ba zwelela, habakoni kuba ni kunahana hande.

70 Ni bulela se kuzwa ku Muzwale Booth Clibborn, mulikana ka, haiba kuna ni sika kaufela se si maswe- . . . se si nyazahala se si si sa bulapeli, sika kaufela mwa lifasi ku zesiyo mwa pupo, ki mule. Mule ki nto ye mwatasa lika kaufela. Yona mane. . . ha—ha izibi se ili sona. Haikoni kuitahisa ili yona hape. Mule haikoni kukopana ni mule mi ipepe mule yeñwi. I felile. Ha izibi kamba ndata yona kwa zwelela, kamba nihaiba kuziba kuli maa yona ki mañi, kakuli yona neku le ki—ki tonki mi ni mbongolo ya booya fa mulala neku leliñwi. Mulimu na si ka eza cwalo. Musike mwabeya lika zeo ku Mulimu. Mulimu ha si ka eza zeo. Mulimu naize kuli, “Sika kaufela si ka itahisa mwa mufuta wa sona.” Eeni, sha. Kono haili mule kwateni yona ki—ki. . . ndata yona ki mbongolo ya booya fa mulala, kacwalo haizibi ko iwela. Yona ki—ki—ki mbongolo yelika kuba mule, kamba ki mule. . . kamba—kamba ki mbongolo yelika kuba tonki, ki tonki yelika kuba mbongolo. Ha ibizi kuli iwela kai. Mi ina ni toho yetata luli ku ze liteni mwa lifasi. Hamukoni kubeya sepo nyana ku yona.

71 Mi ona cwalo kona ni batu babañata mo ba inezi ni mwa keleke. Haba zibi kuli ndata bona ki mañi, ha ba zibi kuli maa bona ki mañi. Nto ye ba ziba fela, ha ki ba Presbyterian, Methodist, Baptist, kamba kuba Mapentekota, kamba sika sisili. Ha ba zibi kuli ba zwelela kai. Mi tonki ya kale yani, mwakona ku ibiza kuhuwa mo mu konela kaufela, mi yona ika yema fela ona cwalo ni lizebe zetuna ona cwalo yali kupakula, inge mi talimela fela. Mwakona kukutaza ku bona busihu kaufela, kono niteñi habana kuziba shutano yeliteñi haba zwa ni ha ne bakena. Cwale, yeo ki niti. Hani talusi kuba ya halifa, kono Ni bata ku mi bulelela Niti.

72 Kono kuna ni nto iliñwi yeli kona kueza, ki za misebezi hande. Oh, lika beleka fela, kubeleka, kubeleka, kubeleka. Sani si ni hupulisa sikwata sa ma Arminian ba basweli kulika

kusebeza katata kuya kwa Lihalimu. Yeo ki niti, ki mule yeo. Oh, ba Katengo ka Tuso ya Basali, ni ba mulalelo wa kuhu, kwa kuholisa hande, mukutazi. “Mi luna ni kuba mukiti wa kubina wo, ni kutwano ye.” Ki kubeleka fela, kubeleka, kubeleka, kubeleka, kubeleka, kubeleka, kubeleka. Mi, bona, ki sikamañi se ba belekela?

<sup>73</sup> Hamu ba buza kuli, “Kikuli mu amuhezi Moya o Kenile kukala ha mu lumela?”

<sup>74</sup> Ba bapula lizebe zabona, kono haba zibi kuli ba wela kai, “Ki sikamañi so talusa? Kana se kaufela nesili kai? Ki sikamañi so talusa, kuli Moya o Kenile? Hakuna se ni utwile ka Ona. Oh, ulukela kuba wa mifuta yani ye fitelezi hahulu kwa tumelo.” Mwabona, ha ba zibi kuli ndatabona nali mañi, kamba kuli maa bona nali mañi, niteñi. Mi muna ni kuba nata fa nto ni nto kaufela ye mueza, kunata *fa* ni kunata *fani*, ni kunata *fa* ni kunata *fani*. Yeo ki niti, ki mule ya kale yeo.

<sup>75</sup> Kono, Na mi bulelela, hamu lukeli kueza cwalo kwa mbongolo ya niti ye pepilwe cwalo. Ki kuishapa fela fa mukokoto hañwi, mi muzwale, ika takisa. Ya ziba se ieza. Oh, ha ki bunde ni boo kupahama pelesa ya niti ye pepilwe ona cwalo! Mo kubezi bunde kubulela kuli, “Taha kwanu, mushimani.” Oh, muuna, ki hande uswale ka kutiisa, ikasana ya siya sipula mwa moya.

<sup>76</sup> Kona mo ba inezi ni Bakreste ba luli baba pepilwe ona cwalo. Haleluya! “Mu amuhele Moya o Kenile. Mubake, mañi ni mañi wa mina, mi mukolobezwe ka Libizo la Jesu Kreste, kwa swalelo ya libi za mina.” Ki kutakisa, kapili luli mobakonela kufitela kwa mezi, baile. Ha bakoni kupula musihali ni busihu kufitela ba amuhela Moya o Kenile. Kiñi? Mwa ziba, Mukreste wa ziba Ndatahe kuli ki ufi. Mwabona, silwala lika zepeli kuli kube ni kupepa mwana. Yeo ki niti, ndate ni mee. Mule kwateni yona haizibi ndata yona, kamba kuli maa yona ki ufi. Kono luna lwa ziba Yali yena Ndata luna ni Maa luna, kakuli lu pepilwe ka Linzwi la Mulimu le li ñozwi, leli pakilwe ka Moya. Pitrosi naize, ka Lizazi la Pentekota kuli, “Hiba mubaka ni ku kolobezwa, mañi ni mañi wa mina, ka Libizo la Jesu Kreste, kwa swalelo ya libi za mina, muka amuhela mpo ya Moya o Kenile.”

<sup>77</sup> Mi, muzwale, Mukreste yapepilwe sina hande, (oh, mawi) moya wa hae, ha sa amuhela fela Linzwi, u amuhela Moya o Kenile. Mu buze sika fo cwale! Wa ziba fa yemi. “Kana wa lumela mwa foliso ya Bumulumu?” “Amen!” “Wa lumela mwa Kutaha kwa Bubeli?” “Amen!”

<sup>78</sup> Mubuze mule seo. Bulapeli bwa mule, “Uh, Ha ni zibi. Dokota Jones akile abulela nako yeñwi kuli. . .” Huh! Foo kipeto, muye mulatelele Saule. Mwabona? “Oh, ha ba zibi. Kihande, Na mi bulelela, kekeke yahesi ha izibi hande ka Zona.”

<sup>79</sup> Oh, muzwale, kono muuna ni musali ya pepilwe sinca ka niti wa ziba hande ka kutaha kwa Mulena Jesu, bona bana ni niti

hande kuli ba amuhezi Moya o Kenile haibile fela kuna ni Moya o Kenile ona ni kufiwa.

<sup>80</sup> Cwale, Jesu naize. . . Musali fa lisima, “Lu lapelelanga mwa lilundu le, mi Majuda ba lapelelanga kwa Jerusalema.”

<sup>81</sup> Ki hali, “Musali, utwa Manzwi a Ka! Nako ya taha, mane se itile, fo Ndate u tabela kuli baba lapela ba Mu lapele mwa Moya ni mwa Niti.”

<sup>82</sup> Linzwi la Hao ki yona Niti. Mi mutu kaufela yaka bala Bibeledi ni kulumela Linzwi kaufela leo Bibeledi ibulela, ni kulatelela milao ya Yona, ni kuamuhela Moya o Kenile o swana o ne ba amuhezi, ka mukwa oswana o ne ba U amuhezi ka ona, ona linepo zeswana ze ne ba amuhezi ka Ona, ona mata a swana o ne ba amuhezi ka Ona, wa ziba yo Ndatahe ali ni Mahe ali yena. U ziba kuli utapile mwa Mali a Jesu Kreste, upepilwe kwa Moya, utalizwe ka muzamao wa Mulimu. Wa ziba fa yemi. Luli! U mwa Kanana. Wa ziba kwa zwelela. Kona mo kuinezi ni ku Mukreste wa niti. Mu mu buze kuli, “Kana u amuhezi Moya o Kenile kuzwa nako yo lumela?” “Amen, muzwale!”

<sup>83</sup> Ne ni yemi zazi leliñwi bukaufi ni muhalalehi wa kale, wa myaha ye nainte tuu ya kupepwa, ne ni bulela ni mulisana wa myaha ye eite ya kupepwa, Na li, “Kuku?”

Neli fela ya tiile sina mwa kona kubela, mi ali, “Eehe, mwana ka.”

<sup>84</sup> Se nili, “Se kubile nako yekuma kai kuzwa fo amuhezezi Moya o Kenile?”

Ki hali, “Kanya ku Mulimu! Mwendi ka myaha ye mashumi a silezi kwa mulaho kona fo Ne ni U amuhezezi.”

<sup>85</sup> Cwale, haiba neli mule, na ka bulela kuli, “Cwale, libelela fa muzuzu, Ne ni tiiselizwe ni kufafalezwa ha ne Ni sali. . . Kihande, kaniti, mi ba ni kenya mwa keleke mi Na isa liñolo laka ku ngete.” Oh, sishemo kuna! Ha ba zibi kuli mane ba wela kai.

<sup>86</sup> Kono yena na ziba kone kuzwa tukelo ya kupepwa kwa hae. Naliteni hane iezahalile. Na pepilwe ka mezi ni ka Moya. Na ziba, mi mezi ka kutapiswa ka mezi ni ka Linzwi, kuamuhela Linzwi.

<sup>87</sup> Cwale mutalimele mwa ñolela, “Ku babali ku Kreste Jesu.” Paulusi, cwale, muhupule. . . Ni sweli kuliye ha fateni fa nako luli, kono ha Nina kufeza kauhanyo ye kaufela. Kono Ni ka akufa. . . Kana mwa lata cwalo? Oh, I lu bulelela fo lu zamaela, kono halukoni kuezwa cwalo mwa busihu fela bulihuñwi. Lutokwa kweli kamba zepeli kuli lueze se, busihu ni busihu, kukena fela ku Yona, Linzwi ka Linzwi. Kukuta mwa mulaho ni ku li shitula mwa litaba za kale ni ku li tatulula hande, Linzwi ka Linzwi, ni ku mi bonisa kuli Ki yona Niti. Cwale mutuhele ni bale timana yani kapili hape.

*Paulusi, muapositola wa Jesu Kreste ka tato ya Mulimu (isiñi tato ya mutu), ku ba bakenile mwa Efese, ni (kukopanya) ku baba sephala ku Kreste Jesu:*

<sup>88</sup> Taluso kikuli, “Ba se ba bizelizwe kwande, ba kauhani, mi cwale ba kolobelizwe ka Moya o Kenile, mi bainzi ku Kreste Jesu. Ni ñolela liñolo le ku mina, balatiwa ba ka.” Oh! Ni sepa kuli Paulusi kwani hamoho ni bona cwale, oh, ha ki tabo ni yeo! Yena muapositola wa kale yani na pumilwe toho kwateni. Ne ni yemi fa sibaka fo ne ba mu pumezi toho ya hae. Kono, oh, toho ya hae iiketile hande mwa mubili omunca wani, mi haikoni ku pumiwa kwateni hape. Mi uyemi kwabuse kwani ni bona ka ona muzuzu wo, yena muapositola yaswana yana ñozi Se. Mi ali, “Ku mina babali ku Kreste Jesu! Ka Moya ulimuñwi luna kaufela lu kolobelizwe mwa Mubili ulimuñwi.” Cwale mutalime.

*Sishemo sibe ni mina, ni kozo, yezwa ku Ndata luna, mi. . . ni Mulena Jesu Kreste.*

*Kufuyolwe Mulimu Ndatahe Mulena luna Jesu Kreste, ya lu fuyozu ka lika kaufela. . .*

Oh, kana wa utwa seo, Charlie?

*. . . ya lu fuyozu ka limbuyoti kaufela za moya. . .*

<sup>89</sup> Isiñi fela zeñwi kwa baapositola, ni zeñwi ku se, kono U lufuyozu ka limbuyoti kaufela za moya. Ona Moya o Kenile oswana ono wile ka Lizazi la Pentekota ki ona Moya o Kenile oswana oliteni mo busihu boo. Ona Moya o Kenile o swana ono ezize Maria kuhuwa ni kubulela ka malimi, ni kuba ni nako yende ni kunyakalala, ni lika za na ezize, ki ona Moya o Kenile o swana oliteni mwahali mo busihu boo. Ona Moya o Kenile o swana ono lumelelize Paulusi fa sisepe sani, sene si bonahala inge ne si tezi fela mezi mi ne siya si tiba, mane aina fateni mazazi a lishumi ni mazazi amane ni musihali ni busihu, kusina kweli ni linaleli. Atalima kwande kwani mi lindinda kaufela nelina ni moya o lunya ku lona, kwa matuku, ni kukweca meeno a hae, mane ali, “Ni ka ku tibisa, mucaha, cwale. Ni ku sweli cwale.”

<sup>90</sup> Mi cwale Paulusi hana ilo ba ni tapelo nyana, ne ku yemi Lingeloi, lali, “Si sabi, Paulusi. Sisepe se si ka sinyehela fa sooli sesiñwi. Zamaya u yo icela mulalelo wa hao, ku iketile cwale.”

<sup>91</sup> Kiyo ataha ni ona mawenge ani kwa mazoho a hae, inza a hoholola kwa mahutu a hae, mi ali, “Musike mwa saba, baana, kakuli Mulimu, ka Lingeloi la Mulimu, yo Ni li mutanga wa hae, uyemi nina mi ani bulelela kuli, ‘Paulusi, si sabi.’” Ona Moya o Kenile oswana wani uteni mwahali mo busihu boo, ona Moya o swana wa Mulimu, unzo bulela ku luna limbuyoti ze swana za moya.

*. . . ya lu fuyozu ka limbuyoti za moya kaufela mwa libaka za mahalimu. . .*



<sup>92</sup> Oh, ha lu yemeñi fa muzuzu ulimuñwi fela fa. “Mwa libaka za Mahalimu.” Cwale, fela ha ki kwande a sika kaufela, kono mwa libaka za Mahalimu. Lu kopanela mwa “Mahalimu,” ku talusa kuli ki sibaka sa mulumeli. Kuli, haiba Ni lapela katata, ni mina mulapela katata, kamba keleke ha ilapezi katata, mi lu itukiseza Liñusa, mi lu putehani hamoho kuba ba bakenile, baba bizizwe, baba kolobelizwe ka Moya o Kenile, baba tezi limbuyoti za Mulimu, baba bizizwe, baketwa, babainzi hamoho mwa libaka za Mahalimu cwale, lu mwa buino bwa Mahalimu mwa mioyo ya luna. Mioya ya luna ilu tisize mwa buino bwa Lihalimu. Oh, muzwale! Ki fo he cwale, buino bwa Lihalimu! Oh, kiñi se si kona kuezala busihu bo, kiñi sene si ka ezahala busihu boo haiba ne luka pila mwa buino bwa libaka za Mahalimu, ni Moya o Kenile unzi zamaya mwa pilu ifi ni ifi kaufela ye bupilwe sinca ni kuba sibupiwa sesinca ku Krete Jesu? Libi kaufela mwatasa Mali, mwa milapelo ye petehile, ni mazoho a luna inza nanuhezi mwahalimu ku Mulimu ni lipilu za luna li nanuhile, luinzi mwa libaka za Mahalimu ku Krete Jesu, lunze lu lapela hamoho mwa libaka za Mahalimu.

<sup>93</sup> Kana mukile mwaina mwa sibaka seo? Oh, Ni inzi mane kufitela Ni lila bakeñisa tabo ni kubulela kuli, “Mulimu, usike wa ni lumeleza kuzwa fa.” Ki libaka za Mahalimu fela ku Krete Jesu!

<sup>94</sup> Ku lu fuyola ka sikamañi? Foliso ya Bumulimu, zibo ya makalelo, sinulo, lipono, mata, malimi, litoloko, butali, zibo, limbuyoti kaufela za Lihalimu, ni tabo ye sa konahali kubulelwa ni buñata bwa Kanya, pilu kaufela itezi ka Moya, kuzamaya hamoho, kuina hamoho mwa libaka za Lihalimu, kusina nahaiba bumaswe mwahala luna, kokutokwa nahaiba ya zuba kwai, hakuna nahaiba ya tinile ndelesi ye kuswani, isiñi se, *sani* kamba *sesiñwi*, ko kutokwa nahaiba mulelo o maswe, hakuna mutu yana ni sa kufumbela yomuñwi, mañi ni mañi ubulela ka lilato ni ka kutwano, mañi ni mañi uinzi mwa buñwi mi mwa sibaka silisiñwi, “mi kapili fela kwa utwahala muhuwo o zwelela kwa Lihalimu inge moya o mutuna.” Ki fohe cwale, “Ya lu fuyozi ka limbuyoti kaufela za moya.”

<sup>95</sup> Konakuli Moya o Kenile wakona kuwela ku mutu, mi ubulele kuli, “KISONA SA BULELA MULENA. Zamaya kwa sibaka sa kuli mi u yo eza sa kuli.” Mutalimele mi musibone ha si ka ezahala ona *cwalo*. [Muzwale Branham uliza munwana wa hae—Mu.] Mwabona? “KISONA SA BULELA MULENA. Eza sika sa kuli mwa sibaka sa kuli.” Mutalimele mi musibone ha si ka ezahala ona *cwalo*. [Muzwale Branham uliza munwana wa hae.]

<sup>96</sup> “Ya lufuyozi hamoho ka limbuyoti za Lihalimu mwa libaka za Lihalimu.” Mutalimele!

*Kuya ka mwa lu ketezi . . .*

97 Kana ki luna lu Mu ketile nji, kamba U lu ketile yena? U lu ketile. Lili? Ona busihu ha lu Mu amuhela? Kuketwa!

*Kuya ka mwa lu ketezi ku yena mane mutomo wa lifasi usika tomwa kale, kuli lube baba kenile... babasina litiba fapila hae mwa... (likopano?)... mwa lilato:*

98 Ki lili Mulimu fa na lu ketezi? Kana ki lili Mulimu fa na ku ketezi wena yana ni Moya o Kenile? Ki lili fa Na ku ketezi? Kale kafoo mutomo wa lifasi usika tomwa kale. Ka zibo ya Hae ya makalelo, Na ku boni ni kuziba kuli no ka Mu lata. Mane kusikaba kale mutomo wa lifasi, A ku keta, mi a luma Jesu kuli Abe tifo ya libi za hao, ku to kubizeza kwa kutwano, ku Yena kasibili, kwa lilato. Oh, kambe luna ni mizuzu yemiñwi hape kwa nako.

99 Halu boneñi, lu si ka ya kale kwapili, lukutele mwa mulaho, Genese 1:26. Ni ka ikutela la Bulalu. Fani Mulimu ha eza mutu... Mane Asika eza kale mutu, Na ipiza Iliyena kuli "El," E-l, El; E-l-h, "Elah," "Elohim." Linzwi leo litalusa, mwa Siheberu kuli, "ya ipupile iliyena," lika kaufela ka Yena anosi. Hakuna sene siliteni kusikaba Yena pili, Nali yena fela kubateni kwa lika kaufela zekile zaba teni, ya ipupile ili Yena! El, Elah, Elohim, kotalusa kuli "ya kona lika kaufela, ya mata kaufela, Yamata, ya ipupile ili Yena." Oh!

100 Kono mwa Genese 2, ha Na ezize mutu, A bulela kuli, "Ki na," Y-a-h-u, J-u-v-u-h, *Yahweh*, "Jehova." Ne si talusa sikamañi? "Ki na ya ipupile ili Na mi Ya bupile sika ka Na muñi, kuli nibe mwana wa Ka kasibili, kamba wa swalelele, kamba yo munyinyani ya ni swana, yomunyinyani fela wa Ka." Kanya! Kiñi? A fa mutu... Jehova italusa kuli Na file mutu kuba mulimu yomunyinyani. Kakuli ki Yena Ndate, Mulimu, mi A eza mutu kuba mulimu yomunyinyani, kuli Asike aba ya ipupile anosi ni hanyinyani, U pila ni lubasi lwa Hae. Elah, Elah, Elohim. Cwale, cwale Yena ki yena Jehova. *Jehova*, kotalusa, kuli "Yena Ya pila ni lubasi lwa Hae." Cwale, Mulimu u ezize mutu kuba ya busa lifasi kaufela, nana ni puso. Mi lifasi neli sibaka fa kupila mutu ni kubusa. Kana ki Mañolo ao nji? Mi cwale haiba sani ki sibaka sa hae, nali mulimu wa lifasi. Nakona kubulela sakuli, mi ne sina ni kuba cwalo. Nakona kubulela sa kuli, mi ne siba ona *cwalo*. Oh! Ki Yena yo cwale, Mulimu, Jehova, ili Yena Ya na pilanga mwa pupo ya hae anosi, kono cwale upila ni lubasi lwa Hae, mi bana ha Hae bainzi ni Yena. Ki fohe cwale.

101 Cwale, mubale seo. Luka kena ku sona la Bulalu busihu, halukaba ni nako yeñata. Lu sialezwi fela ki mizuzu ye lishumi ka ye ketalizoho fela mi luka ba... Ne ni hupula kuli Ni ka fita fa sibaka sesiñwi fa, kono haluna kukona, fo luka swaiwa ka sepiso ya Moya o Kenile. Ku lukile.

102 Cwale, ki lili fone lu bizelizwe kuba batanga ba Mulimu? Ki lili fo Orman Neville hana bizizwe kuba mutanga Mulimu? Oh,

mawi! Se sa ni tantalikisa. Ni ka mi bulelela, halu baleñi Mañolo amañwi. Ni bata kuli uapule Pitrosi Wapili 1:20. Mi, Pat, uapule Sinulo 17:8. Mi Na ni ka apula Sinulo 13. Cwale lubata kuteeleza fa, mubata kuziba kuli ki lili Mulimu hana mi bizize kuli mube Bakreste. Oh, Na lata se. Se, “Mutu hana kupila ka buhobe fela, kono ka Linzwi kaufela le li zwelela mwa mulomo wa Mulimu.” Ku lukile, Muzwale Neville, una ni Pitrosi Wapili 1:20. [Muzwale Neville uli, “1:20.”—Mu.] Kihande, bala 1:19 ni 1:20. Muteeleze ku se. [“1:19 ni 20.”] Eeni. [Muzwale Neville ubala Pitrosi Wapili 1:19-20.]

*Kono ki ka mali a Kreste a butokwa, aswana sina a ngunyana yesina se si nyazahala kamba litiba:*

*Yena na leliwhe pili lifasi li si ka tomwa kale, mi ubonahaliswa mwa linako za mafelelezo kabakala mina.*

103 Ki lili fa na lemuhezwi? Lifasi lisikaba kale ni mutomo. Muzwale Pat, ni balele Sinulo 17:8. [Muzwale Pat ubala Sinulo 17:8—Mu.]:

*Sibatana so boni ne siliteni, kono hasiyo; mi sika tuha si longoka mwa musima osina mafelelezo, mi sikene mwa nyandiso: mi baba yahile mwa lifasi ba ka komoka, be mabizo a bona ha si ka ñolwa mwa buka ya bupilo haisamba lifasi litomwa, ha ba bona sibatana sene siliteni, mi ha si yo, mi siteni.*

104 Ki mañi yaka pumiwa? Ki mañi yaka pumiwa ka mutu wa bulapeli yo sina Saule mwa na bezi? Sani neli sa butali luli mane se si petehile kufitela sikona kupuma mañi? Bona Ba- . . . [Kopano ili, “Baketwa.”—Mu.] haiba. . . [“kukonahala.”] haiba kukonahala. Ku lukile, Sinulo 13:8, ha lu boneñi ni mi balele yona.

*Mi kaufela baba yahile mwa lifasi baka. . . kaufela baba yahile mwa lifasi ba ka mu kubamela, be mabizo a bona a si ka ñolwa mwa buka ya bupilo ya Ngunyana ye tabilwe haisamba lifasi litomwa.*

105 Ki lili mabizo a luna fa na ñolezwi mwa Buka ya Bupilo ya Ngunyana? Fani Ngunyana hane itabilwe kusikaba kale mutomo wa lifasi. Fani Mulimu hanali Jehova, El, Elah, Elohim, yena ya ipupile Iliyena. Inge fela Daimondi ilimu yetuna, mi Na sike kuba sika sisili fela, kono mwahala Daimondi ye nekuna ni milelo ya Hae yakuba Mupulusi. Mwa milelo ye, mwahali a ku Yena, neli kuba Mufolisi. Kihande, nekusina sa kupilisa ni sa kufolisa, kono milelo ya Hae ya bonisa seo. Kacwalo, mi kusikaba kale mutomo wa lifasi, fani ha Na zibile, kuli ponahazo yetuna ye ku Yena, kuli Na kaba Mupulusi, kuli Na ka taha mi aezwe mwa nama mi ayahe mwahala luna, mi A ziba ka miupa ya Hae kuli ne lu ka foliswa, A bulaya Ngunyana mwa Buka ya Hae kusikaba kale mutomo wa lifasi, mane añola libizo la mina Buka yani kusikaba kale mutomo wa lifasi. Oh!

106 Muteezeze ku Se! Tukiso ya ko mulibile italimela kwa zibo ya makalelo, Ni talusa kuketwa. Kuketwa kutalimela kwa mulaho kwa zibo ya makalelo, mi tukiso ya ko mulibile italimela kwa pili. Musike mwa libala seo, kuli kuketwa kutalimela kwa mulaho kwanu, ki ye fa, “Nenili peu ya toze. Ne ni pepilwe mwa sibi, naba mwa siswaniso sa bumaswe, ni tahile mwa lifasi inge ni bulela buhata, ni pepezwi mwahala baezalibi. Bondate ni boma ni lubasi lwa hesi kaufela, ki baezalibi. Ne nili peu ya toze. Kono, hañi hañi fela, Na to ba bubeke bwa buloto. Ne ku ezahalile cwale?” Kuli, ki sikamañi sani? Kuketwa. Mulimu, kusika ba kale mutomo wa lifasi, ku ketwa kuli peu ya toze yani ibe bubeke bwa buloto. “Cwale Ni ziba kuli se Nili bubeke bwa buloto, kakuli Ni pilisizwe. Cwale Ni eza cwani zeo?” Mutalimele kwa mulaho mi mubone kuli Na li lukiselize ona cwalo, nako ya kwa mulaho kafoo. Ka zibo yapili Na boni kuli ne Ni ka Mu lata, kacwalo Aeza tifo ka Mwana Hae Luli, kuli ka Yena Ni kone kuzwa kwa kuba peu ya toze nibe bubeke bwa buloto. “Cwale, kikai fo Ni inzi cwale?” Ni pilisizwe, Ni zamaya mwa sishemo sa Mulimu. “Kulemuhiwa kwa makalelo kutalimela kai?” Kwa pili. “Kikai kwa Ka ni isa, mi ki kai ko Ni ya?” Amen. Sani kona se si mi sweli. Ki fohe cwale.

107 Cwale halu baleni fa pata nyana, mi kipeto lukaba ni kukwala kapili fa.

*Ka mwa lu . . . ketezi ku yena kusikaba kale mutomo wa lifasi, kuli lube baba kenile . . . mi lutokwe litiba fapila hae mwa lilato:*

*Ka ku ikañulela luna, a luketa ka kuikañulela luna kuba bana ba hae ka Jesu Kreste, ka kulata kwa hae,*

108 Ki sikamañi sa Na ezize? Yena, ka kuziba kwa makalelo, alu bona isali kwa simuluho, ka kuziba kuli Nali yena Mupulusi, ya ipupile iliyena. Nekusina Mangeloi, nekusina sika; neli Mulimu fela, Elah, Elohim, ya ipupile ili Yena anosi, hakuna sika kwanda Hae anosi. Kono ku Yena nekuna ni Mupulusi. Kihande, ki sikamañi Sa ka pilisa, hakusina se si latehile? Ka kuziba cwalo, konakuli Na zibile kuli mulelo omutuna onoli ku Yena no ka tahisa nto yeñwi kwande a ya Na ka to pilisa. Mi cwale hane kubile seo, kuya ka zibo ya makalelo A talimela fafasi mi Abona mañi ni mañi kaufela yana ka I amuela. Mi cwale ka kueza cwalo, Abulela kuli, “Kwa kupilisa sani, nzila fela inosi ye Ni kona kueza ka yona, ikaba ka kutaha fafasi Na kasibili mi ni ezwe mwa nama kuli ni nge sibi sa mutu fa halimwa Hae, ni ku mu shwela, kuli Ni kone kuba Ya lapelwa,” kakuli Yena ki Mulimu, sibupwa se si lapelwa.

109 Mi ki Ha sa taha fafasi ni kuikungela sona ku Yena. Mi ha Na eza cwalo, Aeza sani kuli Akone kupilisa mina ba bakona kupiliswa. Kana mwa bona se Ni talusa nji? Ka kuziba kwa makalelo, yena Mulimu ya sa palelwi, Ya ziba lika kaufela,

abona Ngunyana, mi A bulaya Ngunyana kusikaba kale mutomo wa lifasi, mane Abeya libizo la mina mwa Buka ya Bupilo ya Ngunyana. Mi Abona bupumi bwa Satani, sa na ka eza. Kacwalo Abeya libizo la mina mwateni. Mi Abulela kuli antikreste ukaba wa bulapeli hahulu, bunde luli, mutangana yo munde cwalo, muuna ya butali cwalo, muuna wa bulapeli cwalo, kuli akone kupuma ni bona ba baketilwe haiba ne kuka konahala. Kono ha ku konahali, kakuli mabizo a bona na lukiselizwe kale kusikaba mutomo wa lifasi. Ka kuketwa A ba keta, mi ka kulemuhiwa kale ba ziba ko baya. Ki fohe cwale.

<sup>110</sup> Cwale, ki mañi yakona kukakanya sani? Sani kona sana bulezi Paulusi. Ao ki Mañolo a Paulusi. Zeo ki litaba za ñozi Paulusi. Ki zona za na lutile keleke ya hae. Kwa keleke, ka sibaka sa yona, kusikaba kale mutomo wa lifasi. Fani Mulimu, mwa butuku bwa Hae bwa kupepa, na sweli kupepa, kupepa mina, ka kuziba sene muka eza, A mi beya kaswanelo mwa sibaka sa mwa Mubili wa Hae Luli, kuli mube mufumahali ya nyezwi, kuba mulimi, kuba mukutazi, kuba mupolofita, kuba se ni kuba *sani*. U mi tomile hande mwa sibaka. Konakuli lutile kuzwa mwa naha ya kuca garliki ya Egepita, ka kukeniswa, mi lu kolobelizwe kukena mwa naha ya sepiso. . . Kakuli, sepiso ya Mulimu ki Moya o Kenile. Maefese 4:30, ili, “Musike mwa halifisa Moya o Kenile wa Mulimu ili ka ona muswailwe kuisa lizazi la kuliululwa kwa mina.” Konakuli Mulimu, amana ku lemaha keleke isali kwa makalelo, A bulela kuli, “Mi macaba kaufela, kukaba ma milioni a mashumi ku alulwa ka ma milioni ababa ka zamaya ka bulapeli luli kono baka pumiwa.” Bona banosi fela babasike kupumiwa ikaba bao babatile mwa naha ya sepiso, ili bao kusikaba kale mutomo wa lifasi mabizo a bona na ñozwi mwa Buka ya Ngunyana ya Bupilo, mi batile mwa naha ya sepiso, mane baikola yona.

<sup>111</sup> Batu babañata ba saba kuli muka eza ze swabisa. Batu babañata kuli Moya o Kenile uka mi ezisa kuli mu—mu swabele batu. Batu babañata ba saba kuli ba ka lila, mi mulatiwa wa bona uka ba bona ha ba lila, kamba bomaa bona, kamba yomuyahile mabapa ni yena, kamba mulena mina fa musebezi uka mibona.

<sup>112</sup> Halu boneñi ni mi bulelela ka muuna cwana zazi leliñwi, lusika kwala kale. Nekuna ni muuna ya bizwa Davida, mi fani mane areka ya Mulimu hane isali mwa naha ya Mafilisita, mi Ya taha, ayo hoha areka, sikocikala sa kale kona sene si ihoha, mi Davida abona areka yani inge itaha, na apezi mukanjo nyana cwalo, amatela teñi kwani, a nepela mahutu a hae mwa halimu, ni kutula tula, ni kuhuwa ni kutulaka, ni kubina ni ku tulaka ni kubina. Mi, yena, mulena wa Isilaele! Mi musala hae atalimela fande mwa lihaululo ni ku mubona inza eza lika ze sa swaneli, amu nyefula. Kiñi, hakulata na bulezi kuli, “Sikuba sani! Mu mubone koo, mwa sweli kuezeza, inza kibakiba kulahaka mahutu a hae

mwahalimu, ni ku mbambala kutulaka inza eza lika ze cwalo. Kiñi, u lukela kuba ya lyangani!” Mi busihu bwani amano kena mwahali, musali ali, mwa manzwi aswana sina cwana, “Kiñi, u ni swabisize. Kiñi, wena, kuba mulena, muuna ka, fa patelo kona fo no ka ezeza zani, likezo ze cwalo zani!”

<sup>113</sup> Davida ali, “Kamuso Ni ka eza mane kufitelela fani. Eeni, sha!” A bulela kuli, “Kana ha u zibi kuli Ne ni sweli kubinela Mulena?” Na sa silezi mwabuse! Nali mwa naha ya sepiso. Na sa felezwi ki mikwa ya buiswalo kaufela ni masila a lifasi. Na tabile hahulu ka kuziba kuli areka neitaha mwa muleneñi wa hae.

<sup>114</sup> Mi, oh, Na mi bulelela, batu babañwi ba saba kuamuhela Moya o Kenile, ba saba kuli baka swana ba bulela ka malimi. Ba saba kuli mutu yomuñwi uka bulela kuli, “Cwale, ni yena ki alimuñwi wa micaha ya malimi.” Ba saba kutaha kwa keleke ni ku to kolobezwa ka Libizo la Jesu Kreste, kakuli ba U swabela. Uh! Oh!

<sup>115</sup> Mutu yomuñwi ba bulezi kuli Ni lukela kukutela mwa matepu aka, kakuli Ne ni kutalize za kukolobezwa ka Libizo la Jesu Kreste. Ha ni koni ku ahupula. Ni sweli kupanga amañata hahulu! Yeo ki niti, kuli, nipanga amañata! Yani kona Bibebe. Haiba ha ba tabeli e luezize maabani, mulibelele fela se luka eza kamuso! Yani kona nto ya kueza, mwabona, muzwelepili fela kuya kwapili. Hakuna mafelelezo ku ona, kakuli ki za Mulena. Ki Mulimu.

<sup>116</sup> Mwa ziba sa na ezize Mulimu? Mulimu na talimile fafasi kuzwa kwa Lihalimu, Mi ali, “Davida, u muuna wa fa pilu Ya Ka.” Davida na sa swabi. Nali mutanga wa Mulena. Na lata Mulena. Mi na li ya tabile hahulu, nana ni tabo yetezi luli, kufitela apalelwa kunahana ka za situlo.

<sup>117</sup> Mwa bona, sina ha Ni bulezi mwa kutazo yaka kakusasana cwana, luna ni sabo hahulu, kuli, lu bata Saule kuli alu lute, lu bata Saule yazwa kwa mukopano omuñwi wa bukutazi kuli alu bulelela se lu lukela kueza ka bulapeli bwa luna ni mwa ku si ezeza. Kwani ki kwabuse bobuñwi bwa Jordani. Neku le, Moya o Kenile wa etelela. Kwa neku la kwanu muzwile mwa masila ao. Kwa neku le hamuna taba kamba ba nahana sikamañi. Kwa neku le mu shwile, mi bupilo bwa mina bupatilwe ku Kreste ona cwalo . . . mi lu patilwe ka Moya o Kenile. Hamuna taba. Mu pila mwa Kanana. Mwakona kuyemela twaniso yetuna. Mu sibupiwa sesinca ku Kreste Jesu. Mu tamehile kuya kwa naha ya sepiso.

<sup>118</sup> Na hupula inge ni yemi kwani, Muzwale Collins, lilimo ze mashumi amalalu kwa mulaho, mane keleke ye inge isika yahiwa kale. Neli fela mukopano wa tende yenyinyani cwalo mwa lilulu, mukopano waka wapili. Ne ni sweli kukutaza ona Evangeli yeswana ye, nto yeswana, sifumu se si sa feli sa Kreste, kolobezo ya mezi ya Libizo la Jesu Kreste, kulumela Linzwi kaufela kuba la Niti, kolobezo ya Moya o Kenile, foliso ya Bumulimu, mata a

Mulimu, inge fela mo Ni Li kutaleza ona fa, na li kuba ni keluhe nahaiba hanyinyani ku iliñwi ya Zona. Mulimu upatuluzi zeñata hahulu za Zona ku na, kacwalo, sina Ha Li patuluzi, kona mo Ni Litiseza ona cwalo. Azwisangi ku zebile teñi kale, Yena unza zwelapili fela kukeza kwateni ku Lona.

<sup>119</sup> Ne ni yemi kulo kwani sicaba sesiñata mwendi myanda iketalizoho cwalo inge bayemi fa makamba, inge ba opela, “Fa makamba a Jordani Ni yemi, ni kunepa liito la sepo, mwa naha yende ya Kanana naha ya tabo, kokuinzi maluwo aka. Kana Ni ka fita lili kwa likamba la bunde lani mi ni be ya fuyozwi kamita, kana Ni ka fita lili mi nibe ni Ndate. . . mi ni yo pumula kamita?” Ha ba kalisa kuopela cwalo, Ne ni sweli kuisa mushimani kukena ni yena mwa nuka ku yo mu kolobeza ka Libizo la Mulena Jesu. Na li, “Ndate yakwa Lihalimu, ha Ni nze ni tisa mushimani yo ku Wena kuya ka buipuleli bwa hae. . .” Inge nisali fela mushimani, na kasibili, nina ni maswaniso a zona kwa ndu. Na li, “Hane Ni mu kolobeza mwa mezi, Mulena, kuya ka buipuleli bwa hae, ka Libizo la Jesu Kreste Mwana Mulimu, U mutaze ka Moya o Kenile.” Mi ka yona nako yani Sesiñwi sa tisa kakundukundu, mi Sa taha inge si pikuluha kushetumuka, Naleli ye Benya ya Kakusasana inge si yemi. La yema Liseli lani le mu bona mwa siswaniso. Ona fani La yema.

<sup>120</sup> La ya inge li pikuluha mwa lifasi, ona kwa Canada kwani ni libaka zebapani bukaufi. Se bali, “Liseli la buipiteli li bonahala fahalimwa mukutazi wa Baptist inza kolobeza.”

<sup>121</sup> Mazazi nyana afitile, fani Doctor Lamsa hana tile ku na, mi hakuna sa na ziba ka zani, mi ani tiiseza siswaniso, seo muzwale anani cwale. Kana una ni siswaniso sani nji? Kana una ni Biblele foo, iteni foo, siinzi mwa buka ya hao? Ku lukile. Nekuna ni siswaniso sa sisupo sa kale sa Siheberu sisupo sa Mulimu, ona cwalo fela sene si banga mwa mazazi a Jobo, mane Biblele isika ñolwa kale. Mulimu mwa milelo ya Hae yemilalu, isiñi balimu babalalu. Mulimu alimuñwi mwa milelo ye milalu. Ndate, Mwana, ni Moya o Kenile, liofisi zetalu za na beleka Mulimu ku zona. Isiñi balimu babalali, milelo yemilalu! Mi ne Sili fani. Fani muuna yomutuna yani, Doctor Lamsa, toloko ya Biblele ya Lamsa, hana bulezi kakusasana wani. Ha Ni mu bulelela sani, Na li—Na li, “Ki sisupo mañi sani?”

<sup>122</sup> Abulela kuli, “Sani ki sisupo sa kale sa Mulimu, mwa Siheberu. Mulimu, Mulimu alimuñwi mwa milelo ya likalulo za milelo yemilalu.”

Na li, “Sina zakuli Ndate, Mwabona, ni Moya o Kenile?”

<sup>123</sup> A yema, mi atoma komoki ya hae ya tii ya kofi fafasi, ani talimela. Gene, ni lumela noliteni kwani, Leo. Ali, “Wa lumela cwalo?”

Na li, “Ka pilu yaka kaufela.”

124 Mi ali, “Busihu bwa maabani, inge ni yemi mwa mukopano wa hao, Muzwale Branham, Ne ni boni temuho yani. Nali kuba ni bone fateni sani mwa America, mwa naha ya hesu.” Mi ali, “Batu ba ma American ba mane ha ba zibi Bibe. Nto ye ba ziba fela ki kopano ya bona. Mane haba zibi neba fo ba yemi.” Ali, “Hakuna se ba ziba.” Mi ali, “Kono hane Ni yemi fani busihu bwa maabani,” ali, “Na li . . .” Cwale, Muzwale Gene, Ni bulela fela se ka likute ni lilato ni ze cwalo. Ki hali, “Na li, ‘Yani ulukela kuba mupolofita.’ Kono ha Ni bona kuli mu lumela kuli Ndate, Mwana ni Moya o Kenile ne si milimu yemilalu, neli milelo, konakuli Ni ziba kuli u mupolofita wa Mulimu, kusi cwalo ne li sike ku patululwa ku wena ka mukwa o cwalo.” Ki hali, “Sani kona sisupo se si petehile.” Ali, “Nali kuba . . .” Ali, “Ha u wa ba oneness?”

125 Na li, “Batili, sha. Ha ni wa ba oneness. Ni lumela ku Mulimu kuli ki yena Mulimu Yamata kaufela, mi ni milelo yemilalu yeo ki liofisi fela zetalu zeo Mulimu alimuñwi apila ku zona.”

126 Ki hali, “Ifuyolwe pilu ya hao!” Mi ali, “Zazi leliñwi uka sulula mali a hao fafasi bakeñisa ona zeo, kono,” ali, “bapolofita kamita ba shwelanga mayemo a bona.”

127 Mi Na li, “Kona kuli hakube ona cwalo, haiba si tabisa Mulena ka.” Toloko ya Bibe. ya Lamsa.

128 Oh, ki niti luli. Ki linako zekai, sina ha Ni bulezi kwa keleke ye, sina Samuele hana bulezi ba si ka keta kale Saule, “Mu si kaya kale ku yo ikopanya kwa kopano yeñwi cwale, ni kuikenya mwa kulyangana kwa bulapeli bobuñwi, kiñi ha mu sa tuheleri Moya o Kenile ku mi etelela?” Kiñi ha mu sa ikungeli Mulimu kuba Muteleli wa mina ni ku Mu tuhela kuli ami fuyole, ni kulibala ka za kopano ya mina. Cwale, Ha ni buleli kuli musike mwa fumanaha kwa kopano ifi kaufela ya keleke, mufumanehe ku ye mu tabela kuba ku yona kaufela. Fo kuitingile ku mina. Kono Na mi bulelela, kakuba mutu anosi, kuli mutuhele Moya o Kenile u mi zamaise. Mu balange Bibe. Ni se ibulezi Bibe kuli muezze, mu si eze. Mulimu ami fuyole.

129 Mi cwale se Ni libelezi nako yetelele. Hani zibi haiba kuna ni yomukana mo ya bata kutaha mwa mukoloko wa ku to lapelelwa. Haiba bateni sha, ba nanule mazoho a bona. Alimuñwi fela, bababeli, babalalu. Ku lukile. Kaufela mina mutahe kwanu mu to yema fa haiba mutabela kueza cwalo, ka nako ye, mi—mi lukaba ni tapelo. Mi kipeto luka . . . Hani lati kuli muitahanele kuzwa mulitele pili. Ni bata kueza sika ka swanelo pili lu sika kwala—lusi ka kwala kale.

130 Ki babakai baba tabela palo ya Buka ya Magalata . . . oh, Ni talusa Maefese? Cwale, la Bulalu busihu, luka kena mwa Liswayo. Mi haili la Sunda yetaha kakusasana, lu ka kena mwa sibaka sa kubeya keleke hande mwa sibaka. Oh, haiba . . . luka kena ku zeo kaufela, la Bulalu yetatama ye busihu, mina sicaba



mo mwa Jeff. Ka swanelo luka beya keleke ko ilukela kuba, mañi ni mañi. Mo lu bizelizwe ka ku añuliwa. Mulimu u lu añuzi kuba bana, lu bana ka kupepwa. Lu añozwi mane ni kubeiwa hande mwa sibaka ka Moya o Kenile. Mutalime! Nebali Maheberu mañi ni mañi, hane ba silile nuka, kono Joshua a aba naha mañi ni mañi kulikana ka mubulelelo wa bo mahe fa nako yana pepwa, koo Moya o Kenile no ba bulelezi.

<sup>131</sup> Mutalimele ku Jakobo hana shwa, ali mupolofita, wa sibofu, ahohela mahutu a hae mwa mumbeta, ali, “Amutahe kwanu mina bana ba bashimani ba Jakobo mi Ni mi bulelele ko mukaba ka lizazi la mafelelezo.” Kanya! Oh, Ni ziba kuli Ni kona kubonahala bunca. Sicaba sikona kubonahala bunca. Kono, oh, kambe fela mwa ziba se—se sepiso, ili—ili kucisa mwa pilu! “Mutahe kwanu Ni mi bulelele ko mukaba ka lizazi la mafelelezo.” Mi Nina nikona kunga ona Liñolo leli swana lani, ni kunga mapa ya Majuda ko ba fumaneha ni ku paka ku mina kuli bafumaneha handende fa sibaka seo Jakobo na bulezi kuli bakaba kusona mwa lizazi la mafelelezo. Mi neba si kaba, kwani, haba sikaba fa sibaka sani konji ka la Kandao sebene, 1946, ili busihu Lingeloi la Mulena ha li to bonahala ku na kwani ni kubulela za tumo ye. Mi Na kona ku mi bonisa sani, hane ba kutile mwa sibaka sesinca, ba fita handendende fa sibaka sa na bulezi Jakobo kuli baka pila ku sona. Mi kona fo bainzi kacenu fani. Oh, oh, mawi, oh, mawi! Lu fakaufi ka zazi lililiñwi kwa Hae, ku felile.

<sup>132</sup> Mina sicaba sesinde, mwa kula, kusi cwalo nemusike kuyema cwalo ka mukwa wa kuyema fela. Na ni muzwale wa mina. Nina ni tumo yezwa ku Mulimu ya ku lapelela bakuli. Isi ka kuba . . . kuli Ni na ni mata aku folisa, Hanina ona. Kono Ni na ni mata a tapelo. Sina ha Ni bulezi kakusasana cwana, Davida na si na sika kwanda kafwililo kakanyinyani, kono naize, “Na ziba se ka ka eza ka mata a Mulimu ku kona.” Mwabona? Nina ni fela tapelo nyana ya kufa ku mina, ni mazoho aka kubeiwa ku mina, kono Na ziba seika eza tumelo ku Mulimu. I ezize cwalo ku babañwi, ika eza ni ku mina. Mu lumele ona cwale fela hamunze mutaha kwanu, bukaufi nyana fela ni sibaka.

<sup>133</sup> Cwale, Hani zibi, kuli se sibe ka swanelo luli, haiba Ni sike na kupa muzwale waka kuli atahe ato ba toza ka oli. Uka eza cwalo, Muzwale Neville? Ni kupa keleke kuli muinamise litho kwa tapelo.

<sup>134</sup> Cwale muhupule, sunda ye felile hane Ni kulile hahulu bakeñisa mafula a castor ani, Ne ni ka kona kufa sika kaufela haiba nekukaba mutu yana ka ipa kuto ni beya mazoho. Haiba Ne ni kaba ni yana ka taha, yo Mulimu na fuyozi ni kutusa, Ne ni ka itumela hahulu ka seo. Mina kaufela muikutwa cwale inge mone Ni ikutwezi ka nako yani. Muikutwa cwale kuli ni eze inge mo ne Ni latezi kuli yomuñwi aeze cwalo ku na nako yani. Mulimu alati kuli Ni sabe musebezi. Nibata kuli kamita,

kamba Ni katezi, ni ha Ni fokozi, ha Ni palelwa ku shenyisa lihutu kuzwa ku leliñwi, ni zamaye, kakuli Ni ka kopana mañi ni mañi wa mina hape, mwabuse bwa Naha yani kwani.

<sup>135</sup> Konakuli mina basali bahulu, baana bahulu, baba supezi, ni milili ya limbi mane se ikalile kufela kwa litho, mane ikumauha inge palisa yesweli kuwisa lituhela za yona zenyinyani, inze iwisa matali a yona ni kukayuka kwateni, mutaha fela mwa liemba emba, nji cwani? Yeo ki niti. Fela. . . Mi nto yateni fela ye mubatela kupila hamoho ki kubenyeza kanya ya Mulimu. Kacwalo sila ha si mi sweli cwale ni ku mi katalisa, Ni taha ni kafwililo ka Mulimu, ni tumelo, ni mpo ya nifile Mulimu. Ki se se Ni bulezi, kuli mu si utwisise. Ni ize, “Kambe Pitrosi na ka taha fela, kamba babañwi ba ku bona.” Musike mwa bulela cwalo. Hamu lukeli ku ni lapelela. Mutahe fela ona cwalo, mi mubulele kuli, sina ku musali yo, muli, “Kana ki wena Kezeli wa *Kuli-ni-kuli*?” Ki wena mañi libizo? Kezeli Howard. Kuli, “Ki wena Kezeli Howard. U mulumeli wena, Kezeli Howard? Wa lumela. U mulumeli wena. Konakuli, mwa bona, una ni liswanelo kwa limbuyoti kaufela ze sepisizwe.” Mi ne Ni kali, “Kezeli Howard, lika kaufela likaba fela hande,” ni kuikela. Oh, mo. . . Ni ize, “Ne ni ka huwa, Ne ni ka kalumuka.” Ne ni kali, “Mulena, sina ni kuba fela. Sina ni kuba fela.”

<sup>136</sup> Mi Na hupula, “Kihande, sicaba si nahananga ona nto yeswana yeo ha Ni taha ku to si lapelela.” Kona ona cwalo. Mwabona se Ni talusa?

<sup>137</sup> Mi Ni yemi, linako zeñata, ni kunga batu, ni kubulela kuli, “Oh, kezeli yomunde, kana uka Si lumela? Oh, kana uka Si lumela?” “Mulena, O Mulimu, mu konise ku Si lumela. Batuse ba Si lumele.” “Oh, shangwe, kana muka Si amuhela cwale?” Sani ha kisona. Ni zwile ku zeo. Ni fitelezi kale seo.

Ni ka bulela fela kuli, “Kezeli Howard, u mulumeli wena nji?”

“Eeni, Ni mulumeli.”

<sup>138</sup> “Ku lukile, Kezeli Howard, haiba u mulumeli, u na ni sanda kwa lika kaufela zanani Mulimu.” Ni kuswala fela lizoho la hae. Mwabona, Na lumela cwalo. Ni swalisana ni Kezeli Howard ka ku mubeya mazoho. Jesu na si ka bulela kuli “mu ba lapelele,” Na ize, “Neli kubeya fela mazoho abona ku bona.” Ki hona, kona kuli wa foliswa. Wa kona kubulela kuli, “Lika kaufela likaba fela hande,” Kezeli Howard. Konakuli wakona kuikela kwa ndu mi ube hande. Mulimu aku fuyole.

<sup>139</sup> Wena u kezeli. . . [Kezeli uli, “Hampton.”—Mu.] Kezeli Hampton, u mulumeli wena, nji cwani? [“Ni mulumeli.”] U na ni sanda kwa lika kaufela Za file. Mulimu abe ni wena, Kezeli Hampton. Ikele kwa ndu mi ube hande cwale. Jesu Krete uka ku folisa.

140 Wena u kezeli. . . [Kezeli wa bulela—Mu.] Slaughter. Sani. . . Ki wena yene lu lapelezi kwa sipatela. U mulumeli wena, kanti, Kezeli Slaughter, muca sanda kwa lika kaufela ze lukupa. Kezeli Slaughter, u amuhele so kupile, mi ube hande. Mulimu uka kufa sona.

141 Muzwale Gene, u lumela kuli Mulimu uka kufa sona? [Muzwale Gene uli, “Eeni, sha. Eeni, sha.”—Mu.] Mi cwale Mulena Mulimu akufe, Gene, ona seo luli so kupile! . . . ? . . .

142 Na ku ziba. [Kezeli wa bulela—Mu.] U mulumeli, kezeli. [“Oh, eeni.”] Na ku ziba. Yo ki yena muuna hao foo. Ki yena yene Ni lapelezi ka luwaile zazi leliñwi. Na hupulanga cwalo kamita. Na sa koni kuya kwa mukopano mwa Tulsa. Kutaha kwa mukopano. Mi Mulena amu folisa, amu lumela kwa mukopano. Mwa sibaka sa kuyemela yomuñwi. [“Mwana kezela ka wa mucaha.”] Ha ki ya Bukreste ni yeo, kezeli! Mwabona? Na yemela mutu usili ni yena. Na lu yemezi luna kaufela. U mulumeli mi una ni tukelo ya lika kaufela zeo Mulimu a sepisize. Na ni mutanga Hae. Mi ka Libizo la Jesu Kreste, Ni kufa so kupile. [“Na lumela cwalo.”]

143 Taha, Muzwale Neil. Mulimu aku fuyole. U bile yomunde hahulu ku wena. U mulumeli. Ni ziba kuli uya cwalo. Ni lumela kuli Mulimu uka kufa lika kaufela zo kupile, kakuli u mulumeli. Mi kakuba mutanga Hae, ku wena, muzwale waka, ka Libizo la Jesu Kreste, Ni kufa takazo ya pilu ya hao. Zamaya u iamuhele. Mulimu aku fuyole.

144 Kezeli Bruce, Na ku ziba. Nasi wa mwanana yana ni tozize mafula kwa mukokoto na kuzibile. U kwa njetumuko kwani bukau fi ni motela yebizwa Motel JJ, Twin J, kamba nto yeñwi cwalo. U ka yemela babañwi. Mi takazo ya hao ki ifi busihu bo ku Ndataho? [Kezeli Bruce uli, “Ku na, busihu bo.”—Mu.] Ku wena, busihu bo. [Kezeli Bruce wabulela hape.] Kanti, sila u ku cikisize kufitelela zakona kufumana dokota, kono Ni taha ku ku mbatoka, ni kafwililo. Mi ka Libizo la Jesu Kreste, Ni nongisa lisho la kafwililo fa licwe le li keni mwa lipiyo ka buino bwa kutibeha. Lika mi kutiseza ku Mulimu, kwa ndu ya Hae.

Lu Ku kupile, ka Libizo la Jesu Kreste. Amen.

145 Kana ki mina bondata he muuna yo, sha? Kana u mulumeli? [Muzwale wa bulela—Mu.] Mutuba kwa neku leliñwi; mwatasi, ni kwa neku la nzohoto ya hao. Kana ulumela kuli Mulimu uka kufa yona, sha, ni kakuba mutanga Hae?

146 Mulena, lizoho le hakulata liezize hahulu misebezi yemiñata mwahala lizazi. Ni tile kwanu ka mulelo, kuna ni sa kueza. Aku sife, ka takazo ya pilu ya hae, Ndate, sina ha Ni lapela ka Libizo la Jesu kuli Ueze cwalo. Amen.

147 Usike wa kakanya. Mutuba wani uka tuhela kuku utwisa butuku kafoo, mi ukaba fela hande. Mulimu aku fuyole muzwale.

148 [Kezeli uli, “Toho yaka ya opa ni mumizo. Si utwisa butuku makupo aka ha Ni hotola. Hani koni ku opela. Hakuna se ni kona kueza. Na . . . ? . . . Mi ha Ni koni kulobala nako yetelele. Hakuna mane se ni kona kueza.”—Mu.] U mulumeli wena, nji cwani? [“Ni mulumeli. Ni talizwe ka Moya o Kenile.”] U mulumeli. [Ni ziba kuli Mulimu upila mwahali.”] Mi u mu—mu ca sanda kwa limbuyoti ze kaufela. [“Na ziba. Mi Na lumela. Na lumela mwa litapelo za hao, Muzwale Branham. Ni lumela kuli Mulimu uka ni folisa. Ni lumela kuli Wa alabanga litapelo za hao.”] Ni itumezi.

149 Ndate, Ni tisa yo, kezela ka, mwa sibaka sa mulilo, fahali a sibaka fo ku supilwe. Mi Ni kutisa ku wena, kuzwa mwa liñafwa la sila, ka Libizo la Jesu Kreste. Amen.

150 Ona cwalo fela kona mo kuka bela. [Kezeli uli, “Eeni, Muzwale Branham.”—Mu.]

151 [Kezeli uli, “. . . ? . . . Nina ni liswafu lene li sinyeha, mi leliñwi ne li sinyehile.”—Mu.] Kupazuliwa bakeñisa liswafu.

152 O Mulena, sina kalibe yomunyinyani yo ha yemi fa, kono mane sali mwa buino bwa bunca, Na mu lapelela. Ni liswafu lene li ka zwiswa, mi na sweli kuinama fela, mwa bupilo bwa hae kaufela. Wena u Ndate ku luna, mi Na ni mulilo wa tapelo ya hae, Mulena, yeliba hande fa liswafu lani. Ni luma tapelo ye ka Libizo la Jesu Kreste. Mi haitabe fa liswafu lani ni ku lifolisa. Ka Libizo la Jesu Kreste, Na kupa cwalo. Amen.

153 Ki wena Kezeli . . . [Kezeli uli, “Kezeli Gibbs.”—Mu.] Kezeli Gibbs. [“Ni mwa toho, ni kuba ni butuku ka zona.”] Luli. Toho ya hao ikwahule kuzwa kuna. U mulumeli mane ni muca sanda kwa limbuyoti za Mulimu kaufela, Kezeli Gibbs.

154 Mulena, Ni mutisa ku Wena, ni kafwililo kakanyinyani kona Ko ni file, sina Mo no fezi Davida kafwililo, kuli a lise lingu za ndatahe. Mi haiba sila si taha kulwanisa lingu, na sa sabi. A swala ona kafwililo kakanyinyani kani ni kumatisa litau mwa mulaho ni—ni libere, mi atisa lingu mane kulikutisa. Ye ki tapelo ya tumelo. U ni bulelezi kuli haiba Ni ka “eza kuli batu ba ni lumele mi nibe ya sephala.” Ni tisa Kezeli Gert kwa mulaho kwanu busihu bo. Ni muahuha kuzwa mwa mazoho a sila. Yena ki ngu ya Hao. Ni mutisa kukutela mwa mulaka wa Ndate, ka Libizo la Jesu Kreste. Amen.

155 [Kezeli uli, “Kezeli Lowe.”—Mu.] Kezeli Lowe. [“Nina ni butata bwa pilu bakeñisa mali.”] Butata bwa mali. Mi u mulumeli, nji cwani, Kezeli Lowe? Muca sanda kwa limbuyoti kaufela.

156 Mi, Ndate, Mulimu, Ni libisa tapelo ye busihu bo, inge kuzwa mwa kafwililo ka Mulimu, ka butata bwa mali a Kezeli Lowe. Mi cwale nako yetatama mualafi ha ka anga sipimo sa mali, ha talime ni kubulela kuli, “A iketile cwale.” Uka ziba se si ezize cwalo. Ka Libizo la Jesu Kreste, Ni lifa ku yena. Amen.

157 [Muzwale yomuñwi u ambola ni Muzwale Branham—Mu.] Eeni. Ni lakaza kuli kambe Ne ni kaba ni bondate fa busihu bo, Ne ni ka ba lapelela ona fa cwale. Ni ka eza cwalo ni ku za hao, hape. Na utwisisa.

158 Ndate yakwa Lihalimu, muuna yana punyize mushimani yo ka nto yecisa, yani ki yaliteni mwa lifasi mo busihu bo bakeñisa yena. Mi mwana hae luli ulakaza kuli ndatahe akutiswe apile; kuzwa kwabuse kwani mwa lifasi la sibi, bucakolwa. O Mulena, Ni luma tapelo ye ka tumelo ni mata, mi ni zeo kaufela ze Ni kona ku iyumba ka yona, ona licwe nyana se, ka Libizo la Mulena Jesu. Ni iyumbela ku diabulosi ya beile sika se kuswaseha kwani. Mi cwale haipile. Mi cwale atahe ka buiketo kwa mulaka, ka Libizo la Jesu. Amen.

159 [Muzwale uli, “Ni lapelele kwateni, Muzwale Branham, kuli nibe ni Moya o Kenile. Ni bata kuamuhela Moya o Kenile. Nina ni kuba cwalo. Nina ni takazo yeo. Nina ni kuamuhela Moya o Kenile.”] Una ni takazo ya ku U amuhela. Ubata kutaha mwa Naha kokuna ni lisepiso kaufela. [“Eeni.”]

160 Mi cwale, Mulena, mushimani yo u mwabuse fela bwa nuka, uinzi mwa mafulo, mi Jordani isweli kubayula. Mi hakuna mukwa wa hae kuli asile kwanda kuli Wena u mu ezeza nzila sina mo No ezelize ku Joshua ni kwa Isilaele. Mi, Ndate, Na Ku kupa, kakuba mutanga Hao, tuhela muzwale wa luna yomunde, O Mulimu, ha kene mwa Naha ya sepiso, sepiso ye. Kuli, kwa neku leliñwi, sina ha ne Ni shimbilwe busihu bobuñwi, mi Ni be ni tohonolo ya ku mu yangwela ni ku beya mazoho aka kuyena, mwa Naha yeñwi yani, kuli, “Muzwale waka yomunde.” Lumeleza cwalo, Mulena. Mi a amuhele sepiso ya Mulimu, ona Moya o Kenile. Amen.

161 O Mulena, ku yena, muzwale waka yomunde yo; ona lizoho lelibile bunde le ku na, mi li ni ezelize lika, ze sa koni kubulelwa. Wa lumela mi una ni tumelo. Mi cwale sila silica kuswala nto yena, mulikana ka yo; shuka; mi unahana kuli—kuli wakona ku mu byangula mushimani yo. Kono Ni taha ka ku mu mbatoka. Na taha, kuli ni lamulela yali wa Hao, Mulena, ninze ni pikulusa licwe le ka kunonga hande kwa tumelo. Ka Libizo la Jesu Kreste Ni nata butuku bwa shuka bwani! . . . ? . . . muzwale waka. Kutisa ngu yeli ya Hao luli mwa mulaka, Ndate, ka Libizo la Jesu. Amen.

[Kezeli Bell ubulela ni Muzwale Branham—Mu.]

162 O Mulena, kezela luna uziba kuli bukiti bo ki bobutuna, sina mo ba bulelezi baalafi, kona nto yekona kuku bulaya. “Paundi ifi ni ifi, ina ni bukiti, ilwala silimo mutumbi,” kuya ka kalenda yetoloka lika. Mi ubata kupilela likute ni tumbo ya Mulimu. Mi hakuna dokota yakona kueza se, Ndate, Mulimu. Fela li mwa—mwa lizoho la Hao. Mi Kezeli Bell ubile ya sepahala hahulu. Mi ubile ya musa ni ya itiisa mwa miliko, yafita kuyona. Ufitile

mwa miliko yemiñata mi yemituna. Ni taha kuyena busihu bo, Mulena. Ni taha ku to kopana ni sila sani kwabuse. Ni libisa fateni ka kunonga kaufela ko Ni kona kunonga cwalo. Ka Libizo la Jesu Kreste Ni posa licwe la tumelo ku sona sila sesi musweli se. Mi hali mu hasanye, ni ku mu matisa kuzwa ku yena, mi akone kukutiswa mwa mafulo amatala a miluti yebatelwa ni mezi a kuzize, ka Jesu Kreste. Amen.

Ku kaba cwalo, Kezeli Bell. Fela usike wa kakanya.

<sup>163</sup> Kezeli Spencer. [Kezeli Spencer uli, “Muzwale, Muzwale Bill, Na lata Mulena hande zazi ni zazi le Ni pila. Mi Ni bile nitaha kwanu mwahala lilimo ze mashumi amabeli, ona mwa sibaka se. Mi Ni folisizwe kwa lika zeñata fela zekile za ni kataza. Wa hupula kaufela zona nji, mi. . . ? . . .”—Mu.] Na luli na hupula, kezeli. . . ? . . . [“Mi U ni fuyozi hahulu! Mi Ni Mu lata hande, zazi ni zazi la bupilo bwaka. Ni ziba kuli Nina ni bupilo bobunde ku Mulena.”] Na lumela cwalo, Kezeli Spencer. [“Ni tabile. Ni tabile! Haiba wo ha ki Moya o Kenile o Ni nani, Ni—Ni sali fa aletare kwa lika kaufela Za sa ni bulukezi. Mi Ni ka shwela fa aletare.”] Amen. [“Kwani kona ko Ni bata silwaliso sa sikwalo, ka kushwela fa aletare ni Jesu.”] Amen. Mulimu, si eze cwalo ku yena. Amen. [“Mi Ni ka ku bulelela se Ni bata kuli ueze. Mi mwa nzila, ya kunga lubasi lwaka kaufela kuba nina. Kono Ni bata lubasi lwaka kaufela, mwa ziba.”] Na utwisisa. [“Ni bata kuli balatiwa baka ba piliswe.”] Bana ba hao. Yeo ki niti. [“Ni bana baka.”] Eeni, ima. [“Ni ndu yaka.”] Eeni, sha. Na ziba cwalo. [“Nina ni maikuto akuli ba iketile.”] Eeni. [“U lu lapelezi.”]

<sup>164</sup> Luna kaufela lwa muziba Kezeli Spencer, ni kuziba kuli yena ni Muzwale Jess u pilile mwa butata, kono ubile atahanga kwanu ona mwa keleke ye kwanu. Ha Ni ka silela kwa neku la mwabuse, habana kuzamaya nako yetelele ona cwalo. Bakaba banana. Oh! Muzwale Jess, haiba fela Ni kona. . . ? . . . mwa ziba. Mi cwale mina kaufela mwa ziba libaka, fela—fela fabuse nyana. . . ? . . . fabuse, mu kutela ku musizana yomunyinyani yomunde yani hape, ni Muzwale Jess kuba mushimani yomunyinyani. Mulimu na mi sepisize.

<sup>165</sup> Cwale, mutalime. Ni bata ku kufa fela tuto nyana, ka kuba kuli ki wena wa mafelelezo fa, Ni bata kufa.

<sup>166</sup> Kakuli, Ni ziba kuli yo ki mwana hao wa mushimani, Charlie. Ubata kuli a lapelelwe? [Muzwale Charlie uli, “Eeni.”—Mu.]

<sup>167</sup> Ni bata kubulela taba iliñwi ye. Kana mukile mwabala mwa Mañolo fo Bibebe ibulezi cwana? Paulusi na bulelezi Nduna wa masole baba mwanda wa Muroma.

Kana mwa ni teezeza hande? [Kopano ili, “Amen.”—Mu.]

<sup>168</sup> Abulelela Muroma, fani ha to comola mukwale wa hae, kuli aipulaye, kwani kwa sibaka sa Philippi ha na sali mwa

tolongo. Mi zikinyeho ya lifasi ya nyunga tolongo kaufela. Mi ali, “Ulumele ku Mulena Jesu Krete, mi wena ni ba ndu ya hao mu ka piliswa.” Kana mukile mwa utwa seo? [Kopano ili, “Amen.”—Mu.] “Wena ni ba ndu ya hao.” [“Amen.”] Cwale, mutalime. Haiba una ni tumelo yeñata ya piliso ya hao, kana haukoni kuba ni tumelo yeñata ya ba ndu ya hao? [“Amen.”] Mulimu, mwa mukwa omuñwi, kuka ba cwalo.

169 Mi, Mulena, Ni lapelela Kezeli Spencer ni Muzwale Spencer, busihu boo, kuli mwana kaufela, bona ni bana ba bona, bakaba mwa sibaka sa tabo, Naha ya tabo ko ku sike kwaba matuku kamba busupali, hakuna kuswabiswa, mi ona bupilo nyana bo fa bu ka felela mwa nto yesabisa ye itamaela. Ha bakone ku amuhela se, mi bana ba hae kaufela, ni muuna hae, balatiwa ba hae kaufela, ni baba mu lata kaufela, ni baa lata kaufela, hababe ni yena kwani, ka Libizo la Jesu. Amen.

170 [Kezeli Spencer uli, “Amen. Ni itumezi.”—Mu.] Mulimu aku fuyole. [“Ni kaba wa lilimo ze eite tu za kupepwa, cwanoñu nyana.”] Lilimo ze eite tu za kupepwa. [“. . .? . . . Kono baya ba supala, ka lilimo. Kono Ni sa eza za kutateha kwaka, kutapisa, ni kuhaina, ni kufiyela mwa ndu.”] Inge fela lifasi mo li shanda ukela, Kezeli Spencer. [“Eeni, ku cwalo. Ni katezi hahulu, ka nako kaufela. Ba utwa cwalo. . . Ne ni kupile boma, boma ba mutose, bene bana ni myaha ye nainte ya kupepwa, mo muikutwela hamu ya musupala, nako ya kale kale kafoo. Mi bali, ‘Rose, mwendi uka katala ka nako kaufela.’ Ni katezi.”] Kihande, u libelezi fela ku ya kwa kupumula, mwa bona. [“Ni katezi hahulu, ka nako kaufela. Ni tokwa pumulo. Ni tokwa cwalo.”] Eeni, ima. [“Mi Ni bata kupumulela ku Mulena, nibe fa mañwele aka. Kaufela, lika kaufela ze Ni tokwa.”] Eeni. Ki kubeya fela tumelo ya mina hande ku Yena, Kezeli Spencer, mi uka silela mwabuse. [“Ni bata kushwela fa aletare, ka Libizo la Jesu. Bao kona bo Ni bata kubona, kufitela A ni biza.”] Mi Ali. . . [“Ni bata lika kaufela Za nani zeli zaka.”] Mi mane sina ha Ni ikolwisa inge ni yemi cwana fa ni mina, busihu boo, Kezeli Spencer, ka sishemo sa Hae Ni ka mi bona ni Jess kwabuse bwa museto wani, banana ni babasa ikutwa kutiya. Mina kaufela mukaba inge mumata, inge muhuwa, “Muzwale waka! Muzwale waka!” [“Eeni.”] Ni ka yo kubona.

Misinga ya hae.

171 Ndate, Mulimu, musizana yo nana ni kukula, mi cwale hasana mulyani. Kuna ni fela yena, se si tibela. Kono Ni taha ku ka ku muyemela busihu boo. Ni taha ku Wena, Ndate. Na taha, ni ku Kupa kuli uni zamaise kuli Ni nate fo Ni lukela kunonga, ni pobole. Mi ha inonge hande ka swanelo, milili ye fapani fa mukokoto wa hae. Mi cwale tapelo ye, ka Libizo la Jesu Krete, ni nate fa kuikalelwa kwani ni kupazauha mwa liemba emba, kukutisa ngu ye mwa mafulo a mutapi wa Mulimu. Amen.

Luli ina ni kuba ona cwalo, mulatiwa.

<sup>172</sup> [Kezeli uli, “Mulapele fela. Nina ni bana baba silezi bao Ni kupela kuli Mulimu aba folise ni ku bapilisa.”—Mu.]

<sup>173</sup> Mulimu wa Lihalimu, lumeleza cwalo, bana ba hae baba silezi bao atabela kuli ba piliswe. U utwile bupaki bwani bwa Muzwale Daulton, bana ba hae baba latiwa. U lakaza bana baba silezi, Ndate. Abe ni bona. Mi cwale ha ba yo kopana ni yena mwa Naha yani ko kusina busihu, ba silelezwe ni ku bukelezwa ka Mali a Jesu Kreste. Amen.

Mi hababe ni bona, kezeli, tapelo yaka.

[Kezeli ubulela ku Muzwale Branham—Mu.]

<sup>174</sup> Na ku lumela. Hakuna sika, nihanyinyani, se si kona kutusa. Ba bafa sika nyana se si bonahala inge, oh, sesiñwi se si bonahala inge mulyani wa fibeke. Ki kakulo ya mubili, kona mo ba libizeza. Sani, sa mi bulaya, mane. Sa lyanganisa mali a hao cwalo. Kono, mutalime. Mwabona, kuopa mwa lingongo kuswana sina tau ye byanguzi ngu ni kumatiseza kwahule. Cwale, kafwililo kaka eza sikamañi? Oh, mawi! Kuna ni tau yeuna, ye sweli kulila ka kubopa yena ni ngu. Mi wa lata ngu, kona mwa matezi ni ngu. Kono Davida anga kafwililo ni ku imatisa. Mwabona? Cwale mutokomele. Nana ni macwe aketalizoho: t-u-m-e-l-o, yena kasibili, m-w-a-h-a-l-i. Kafwililo ka hae nekali mwa lizoho la hae *le*: J-e-s-u. Ki munatelo o bulaya. Kuna ni se si lukela kuezahala. Halu matiseni kuopa mwa lingongo kwa, busihu bo, ka tapelo ye. Mulimu alife ku wena.

<sup>175</sup> [Kezeli ubulela ku Muzwale Branham—Mu.] Ubata kuli akolobezwe ka Libizo? [“Batili. Batili. A si ka bulela cwalo.”] U bata kuli akolobezwe. [“Ki takazo yaka ya kumubona ha kolobezwa.”] Ni itumezi, kezeli. Isi kuli yani kona nzila. Fela ki kuli. . . Cwale, haiba sani nesili mwa Bibele, kakuli, “Ndate, Mwana, ni Moya o Kenile,” Ni—Ni lumela cwalo, Ni ka pila hande ka zona, kezeli. Hani—Hani tabeli kuba shutano ni yekana. Ne—Ne ni ka bata zeswana. Hanikoni kutuhela kuli. . . Ni—Ni ka ikalabela ka seo, mwa bona. Mi Ni lukela fela kubulela ka nzila yeo *Ibulela*; isi ka kushutana, kono ka kusepahala.

<sup>176</sup> Cwale, Ndate, lu taha ka ku mumbatokela balatiwa ba hae. Yana ni butuku bwa kuopa mwa lingongo, mi fa ubata kuli a kolobezwe ka Libizo la Mulena Jesu, kakuli ani kona makenelo. Wani kona munyako wa makenelo. Fani kona Joshua fana kwalulezi nzila yene ba siliselize mwa naha ya mwabuse. Nekusina libaka zepeli kamba zetalu ze ne kwaluhile; nekuna ni fela iliñwi.

<sup>177</sup> Pitrosi, ka Lizazi la Pentekota, fani Keleke pili ha ikakulwa, a kwalula nzila, mi ali, “Mubake mañi ni mañi wa mina mi mu kolobezwe ka Libizo la Jesu Kreste.” Bali kuba ba keluhe kwa nzila yeswana yani, mañi ni mañi na silezi mwa Naha ya sepišo.



178 Babañwi ba bona neba lika kusilela mwabuse, kwa njetumuko ya sibaka sesiñwi, mi Paulusi ali ku bona, “Kana mu kolobelizwe ka ifi? Mulika kusilela kai?”

    Mi se bali, “Ki kwanu kwana talimile Joani.”

179 Ki hali, “Kihande, Joani shangwe na supelize fela kwa nako, ni sibaka.” Mi cwale basino utwa cwalo, ba kolobezwa ona fa masilelo ani. Mane basilela mwabuse, ni kuamuhela Moya o Kenile, kihande.

180 Lumeleza cwalo ku kezela luna ni balatiwa ba hae, ka Libizo la Jesu Kreste. Amen.

181 Muzwale Lyle. [Muzwale Lyle uli, “Na lumela kuli luli ki wena nduna ya swanela, Muzwale Branham.”—Mu.] Oh, muzwale! [“Utile kwanu. . .? . . . Wa hupula haiba kuna ni kuba tolo, kutahile sesiñwi. . .? . . . Haiba ubulela pono, kipeto ku lukile. Yani kona yene Ni bile ni yona. Koo, ubile ulola busihu kaufela! . . .? . . .”] Eeni. Yeo ki nako nyana. [“Eeni.”] Eeni. Ni tabile. . .? . . . Mulimu aku fuyole. U mwa musipili wa kuya kwa Naha ya sepiso cwale! Mwendu Ni ka bulela sani.

182 Ki babakai ba bahupula bulumiwa bo fani busika tiisezwa kale kuna, mi na inge ni yamba ni muuna cwana zazi leliñwi, kwani kwa nuka, mwa lisa? Mi Ne ni sweli kuswala tutapi totunyinyani, mi Moya o Kenile wataha fahalimwa ka. Nekuna ni. . . Muuna yo ki Paki ya Jehova, nali cwalo. Muzwale wa hae uteni mo kokuñwi, Banks Wood. Uteni mwahali mo kokuñwi, ili ya yahile mabapa nina.

183 Yo ki Lyle. Mi sicaba se nebali Lipaki za Jehova. Mi se bali, zazi leliñwi hane lusweli kuyamba kwa neku lani, kasamulaho mushimani yo amano baka, Na mu bulelela kuli nekuna ni nto yeñwi mwa bupilo bwa hae, ni se—se ne si ezahalile, ni zona kaufela. Ili, zona za ni bulelezi fela cwale, mi cwale kona a li zusa mwa bupilo bwa hae, yeo ki niti, kaufela seo sili sona. Ona ona cwalo luli. Bo ndatahe neli bona bene bali—bali bo mubali. Kana bondate bateni mwahali mo busihu cwana, Billy? [Yomuñwi uli, “Ha ni zibi.”—Mu.] Mi bona ni bo musala bona, bababeli cwalo, ba kolobezwa, kuba lipaki ka Libizo la Jesu Kreste, kwanu mwa lisa le. Mi muuna yo nainzi bukaufi ni na, zazi leliñwi.

184 Banks, ukai kana? Kana uteni mwahali mo busihu bo? [Yomuñwi uli, “Ki yani kwa mulaho mwa lilulu kwani.”—Mu.] Kwa mulaho mwa lilulu. Eeni.

185 Mi nelu sweli kuyamba. Mi, muzwale, mushimani waka yomunyinyani na bulaile. . . Ni hupula kuli na bulaile kana ka kaze, mazazi nyana kwa mulaho. Kaze ya mushemi yani neina ni twana totunyinyani, mi a ka nanula ni ku kawisa. Na hupula kuli. . . Na li, “Mulena uka zusa bupilo bobuñwi kwa bafu bwa nto yenyinyani,” ka lizazi la kwa mulaho. Kana ku cwalo, Lyle? [Muzwale Lyle Wood uli, “Eeni.”—Mu.] Hane ni inzi fahalimu mwa liñope. Mi se Nili, “Sani KISONA SA BULELA MULENA.”

Mi lwa yamba busihu kaufela kono lwa tokwa kuswala nihaiba se si kana.

<sup>186</sup> Habusa lelitatama, ne lusweli kuyamba, kwa mulaho mwa liñope nyana, kuyamba nakatenge. Yeo ki tapi yenyinyani. Mi Muzwale Lyle nana ni teku yetuna, mi ato celisa nakatenge yo kwateni, kashuto kakatuna kana nani, kufitela, ha to yabula, swala kaufela neikeni luli, kashuto kakatuna, mwa mba ya nakatenge yomunyinyani yoo. Mi cwale ha na ti lo yabula, ato hohela fande za mwa mba kaufela za nakatenge yoo, kuli aka kakutule kwateni. Mi a ka hoha fela ona cwalo, kakuli kashuto kakatuna ne ka sweli mwa mba ya tapi. Mi cwale hana ezize cwalo, aka nepela mwa mezi. Mi a njanja fela, hane kamba ha ketalizoho, mi ani neli mafelelezo, kakuli mala akona ni maaka neli zwelela mwa mulomo wa kona. Mi ka cimbauka cwalo mwendi mizuzu ye likana licika la hola, inge ka cimbauka mwa macacani ani.

<sup>187</sup> Mi Ne ni inzi fani, inge ni yamba. Mi hañi hañi fela, Moya o Kenile wataha, wali, “Bulela kwa tapi yani.”

<sup>188</sup> Se nili, “Katapi tuwe, Jesu Krete wa kufa bupilo bwa hao hape.” Mi katapi kani, kene ka lobezi inge ka shwile mwa mezi, ka fetuha, ni kuya rrrrrroot, kukena mwa mezi, kapili luli mo ne ka konela.

<sup>189</sup> Muzwale Lyle ni Muzwale Wood naliteni ni yena. Muzwale Lyle ali, “Muzwale Branham, sani ne si talusa za ka, kakuli Ne ni bulezi kwa kanto kakanyinyan. . .

<sup>190</sup> [Muzwale Branham ubuela ni Lyle Wood—Mu.] Busihu bo, Na kona kuba bulelela so no bulezi? [Muzwale Lyle Wood uli, “Luli wakona. Ku lukile, Muzwale Branham.”]

<sup>191</sup> Ki hali, hana hohile mala ku kona, aka yumbela fani cwalo, ali, “U yabuzi siemba sa hao sa mafelelezo, mutangana tuwe,” ona cwalo fela. Aka yumbela kafoo.

Ki hali, “Ne—ne ka talusa na.”

Mi se Nili, “Batili, Muzwale Lyle. Seo nesisi cwalo.”

<sup>192</sup> Muzwale Banks kwa mulaho kwani, ali, “Ki batu babakai mwa lifasi le, ki likiti kiti zekai, ze lata kuyema fo luyemi ona fa cwale, kubona mata a Mulimu ha taha kushetumuka fafasi ni kuezsa sika se si cwalo!” Ka manzwi amañwi, yena sina . . .

<sup>193</sup> Ni lumela kuli kaufela luna ne lu utwile sina Pitrosi mwa na utwezi, “Sina ni kuba fa. Halu yaheñi litabernakele zetalu.” Mwabona? Yeo ki niti.

<sup>194</sup> Cwale, Muzwale Lyle, u tozizwe ka Moya o Kenile cwale. U zwile mwa Egepita. Lipoto za magarliki ni busafa bwa lifasi lisiyezi kwa mulaho. U yemi fa likamba la Jordani cwale, mwabuse bwa yona fela. Mi Mulimu ha ku siliseze mwa buse; Lyle.

195 Mulimu Yamata kaufela, ki wo mushukwe wa Hao. Luli nali mwa butata bobutuna, Mulena, kono pilu yaka yaya ku yena. Litapelo za luna li ilo nata fela fa kubata kwani kwa mwabuse ka mutoba hañwi, mi ni taba yene mukataza izwile ku yena. Ise i lubilwe. Mi cwale uzamaya kuliba kwa Jordani. [Muzwale Lyle Wood uli, “Ni Itumezi, Jesu.”—Mu.] Mu ise kwa Naha ya sepiso, Mulena. [“Eehe, Mulena.”] Mi muswaye mwahala sicaba. [“Eehe, Mulena.”] Kuli, ka Lizazi leli kanya lani ha lu ka yo kopana mwabuse, ni te Ni yo utwa ku kumbatela kwa mazoho a hae, inza huwa kuli, “Muzwale waka yomunde!” [“Amen.”] “Na mu ziba.” Tisa Banks hamoho ni yena, Mulena, Uka eza kana; bondate ni boma, ni babañwi kaufela, kezeli, ni lona lubasi tuna lwani? Shangwe ha lute lu yo kopanela mwabuse, Mulena, mi mutu ni mutu wa bona atezi Moya o Kenile. Na lapela ka Libizo la Jesu. Amen. [“Amen.”]

Uka amuhela Seo, muzwale. Mulimu aku fuyole, Muzwale Lyle.

196 [Yomuñwi uli, “Muzwale?”—Mu.] Eeni, muzwale. [“Kuna ni pizo yezwelela kwahule, ni lifu, ze libelezi fa luwaile.”]

197 Kuna ni yashwa, ki pizo ya kwahule mi yetelele fa luwaile. Mi Ni ka sikululela sebeleza ku Muzwale Neville halusainzi mwahali cwana.

198 [Muzwale Neville uli, “Ki lizazi lelituna mi lelinde ku Mulena! Mulimu ulu ezelize lika zende kacenu. Zene ni bata lifumanehile ka kutala—Mu.]

[“Halu yemeñi hamoho, cwale shangwe.]

199 [“Muhupule sebeleza cwale, la Bulalu busihu. Mu lapele hahulu. Kaufela baba si ka kuliswa, ba lipilu ze sa kakanya mube hahulu mwa swalisano ni Mulimu. ‘Nako ifa kaufi. Cwale seli nako. Kacenu ki lizazi la piliso.’]

200 [“Mulimu afuyole mañi ni mañi wa mina baenyi, mina sicaba sesi zwelela kwa libaka za kwahule. Tapelo yaluna, ki kuli, Mulimu amife sishemo sa nzila, kukutela kwa libaka za mina ko mupila. Ki hande ha lubile ni mina mwahala luna. Mi mu lu lapelele hamunze muya, kuli Mulena afuyole ni mwa sibaka mo, hape.]

201 [“Ndata luna yakwa Lihalimu, mutanga Hao mwatezi busihu boo, ku to eza musebezi wa mwa ofisi ya mutanga Hao ni mupolofita, inza yemi mwahali, a pakani, inza tiba kueza lukwakwa, utile ku luna ka maikuto a tuka a mutanga Hao, ka ku kolobezwa ka Moya o Kenile, ni kufiwa ofisi ya mupolofita, ku to bulela kwa lusika loo. Lu tuse kacenu musihali ni busihu, ku amuhela Liñusa le li taha ku luna, Mulena, susuezo, ya buitukiso.]

202 [“Fuyola mañi ni mañi yazwa mwa minyako ya muyaho wo busihu bo. Mi cwale matuku ali fahalimwa luna, ao lusina se

luziba ka ona, cwale sishemo sa Hao se si fuyozwi ni mata li bukeleze ni kusileleza ni ku lufolisa, mi ulu buluke, kufitela nako yani ha U ka itukisa ku lu shimbululela kwa neku la mwabuse. Fuyola kaufela baba zwafile ni baba swabile, baba na ni sabo, ni bona baba fokola.]

203 ["Mulimu, lu lapela busihu bo kuli kube poto yeipitezi, mbuyoti ya moya o Kenile, kuli ibe ku muzamai kaufela, muenyi kaufela, mueti kaufela mwahala minyako ye. Mañi ni mañi yaka zwela kwande busihu bo, hakube kuli lisila lani la Mali, azwa kwa sifapahano sa Kalvari, a apese ni ku tusa.]

204 ["Lu filise ha lu kula. Lu buluke ka mata a Hao. Lu toze kwa sebeleza. Tuhela kuli lu zamaye mwa lilato, fapila Hao, mazazi kaufela a bupilo bwa luna. Mi lu ka Ku lumba ka se, kakuli lu kupa ka Libizo la Jesu Krete ni kabakala Hae. Amen.]

205 ["Mi Mulimu ami fuyole. Mi lu tabile fa kuba ni mina. Mu itumelise mwa mazoho yomuñwi ni yomuñwi."]

206 [Muzwale Branham ukutela fa katala kopano hainze i swalana mwa mazoho ni kulumelisana hanze ba ya.]


207 [Muzwale Branham ubulela ni yomuñwi.] Luli na itumela ka zo ni ezelize, mota ni . . . ? . . . Eeni, sha. Luli na itumela . . . ? . . .

208 [Muzwale Branham ubulela ni Muzwale Neville—Mu.] Konakuli lu lumile liewe la tumelo . . . ? . . . Nekuna ni muuna yazwa kwa . . . ? . . . Kacwalo Ni mu lumezi tapelo, ka Libizo la Jesu Krete. Na lobezi fani hola mutumbi, kusina mali kuzamaya, kusina kubuyela, kusina sikamañi. Kusina kubuyela, kusina mali kuzamaya, kamba kubuyela, kusina sikamañi; meto na lutukile fela mwa toho ya hae, na wile fa katala. [Muzwale Neville uli, "Na mu tuhezi fela inza lobezi fa kufitela kadi ya tapelo yani itaha."]

209 Se si sa kwaluhile nji? [Muzwale Neville uli, "Eeni, si sa tuka," kubonisa kuli maikulofoni isa tukile—Mu.]

210 Ni kupa kuli ba Ni teeze shangwe? Kwahule kafoo, mubuleli wa mwanana, ki mukutazi, kwan kwa Indiana, nasweli kukutaza, awa kushwela kwa katala, ki hola ye fitile fela cwanoñu nyana fa. Inge asweli kukutaza, awa ka pata, mi ashwela fa katala, ki mubuleli ya zibahala hande, nasweli kukutaza ona mwa Indiana mo. Mulisana wa hae ataha mi a ni lizeza. Ashwa inge asweli kukutaza ki tozo ya Moya, awa ka pata, meto ahae a lutuka, bupilo bwa zwa ku yena. U bulezwi kuli na shwile, alobala inza shwile hola mutumbi. Mi sesiñwi sa ba bulelela kuli ba bize keleke mi na ni lapele. Kacwalo se Ni luma tapelo ya ku mu kutisa kuli azuhe, ka Libizo la Mulena Jesu. Hamu kopane nina ka tumelo, kuli isike ya mbwinja fo inongile; amu ncafaze mi aku kutise. Ni itumezi.

<sup>211</sup> Mulimu abe ni mina, kufitela Ni mi bona la Bulalu busihu. Mina sicaba sesizwa kwa Georgia ni libaka ze fa bukafu, musiale sinde musiale sinde. Mulimu abe ni mina.

<sup>212</sup> [Muzwale Branham usiya maikulufoni mi u ambola ni babañwi, kono lingambolo za bona ha li utwahali—Mu.] 

*KUAÑULIWA* / LOZ60-0515E

(Adoption !)

MUKOLOKO WAZA KUAÑULIWA

Liñusa le ka Muzwale William Marrion Branham ne li kotalizwe lwa pili mwa Sikuwa la Sunda manzibwana, Kandao 15, 1960, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi i hatizizwe ni kuhasanyiwa ki ba Voice Of God Recordings.

LOZI

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)